



錫山顧梁汾選

宋詩刪

序

明萬曆末年大儒顧端文公欲盡取古



今海內之書擇其中有合於易詩書禮

春秋者裒而輯之為五經餘各以類從

其所謂詩餘則自楚辭以迄十二代有

韻之言皆是也念宋元詩少善本又方

事講學不暇蒐採於時澗孝廉胡君元

瑞稱詞壇老宿網羅剗劂實殫厥勤乃
移書出篋中所藏屬爲評隲書大意言
宋詩成集者寥寥多旣龐雜少或闕遺
若欲如臨胸馮氏紀恐卷帙徒繁且板
行未易垂遠惟國初高廷禮論詩有返
正功今宜略倣其義例令學者沿流溯
源上追三百篇溫柔敦厚之教而宋以

後次第及之元瑞謹受教未幾厭世書
訖未成公孫庸菴先生胚胎前光學行
一稟端文而口吟手批視端文更多暇
日著述之富積至充棟久之散佚殆盡
先生之冢嗣貞觀壯年棄簪組放浪山
水以自豪晚而倦遊巖居手一編理故
業而涇臯累世縹緲梨棗竟無存者會

武陵胡方伯僑梁溪相與過從借鈔就錄共加商訂得宋詩刪二十五卷持以示純修曰此吾先人未竟之緒也於三百篇大指不知離合云何自謂寬於正變而嚴於雅俗當亦相去非遠吾師之子鄙南君守荆南師向以風雅一燈見屬吾將攜是編就而正焉純修重其意

非如近日詩人沾沾以選政見長且求勝也佐之梓而紀其語如右

康熙歲次丙子初夏古燕張純修序



積書巖宋詩刪總目

第一卷

五言古詩六十九首

第二卷

五言古詩八十九首

第三卷

五言古詩七十九首

第四卷

五言古詩八十六首



第五卷

五言古詩八十六首

第六卷

五言古詩八十五首

第七卷

七言古詩五十六首

第八卷

七言古詩六十二首

第九卷

七言古詩六十一首

第十卷

七言古詩七十二首

第十一卷

七言古詩六十七首

第十二卷

五言律詩一百十九首

第十三卷

五言律詩一百二十八首

第十四卷

五言律詩一百二十五首

第十五卷

五言律詩一百二十八首

第十六卷

七言律詩一百十四首

第十七卷

七言律詩一百十四首

第十八卷

七言律詩一百七首

第十九卷

七言律詩一百十八首

第二十卷

七言律詩一百二十七首

第二十一卷

五言排律四十一首

七言排律八首

第二十二卷

五言絕句九十四首

六言絕句二十二首

第二十三卷

七言絕句一百四十首

第二十四卷

七言絕句一百六十三首

第二十五卷

七言絕句一百四十首

積書巖宋詩刪第一卷目錄

五言古詩一

潘閔一首

徐鉉一首

王禹偁二首

寇準二首

韓丕一首

种放一首

晏殊一首

范仲淹三首

韓琦一首

文彥博七首

王琪一首

黃亢一首

石介一首

蘇舜欽五首



梅堯臣 十三首

歐陽修 十八首

余靖 一首

蔡襄 一首

江休復 一首

傅堯俞 一首

范純仁 三首

趙抃 二首

鄭獬 一首

積書巖宋詩刪卷



錫山顧貞觀梁汾選

武陵胡獻徵存人閱

五言古詩一

潘閔

歲暮自桐廬歸錢塘

久客見華髮孤櫂桐廬歸
新月無朗照落日有餘輝
漁浦風浪急龍山烟火微
時聞沙上雁一一皆南飛

徐鉉

題伏龜山北隅

茲山信岑寂陰崖積蒼翠水石何必多宛有千巖
意孰知近人境旦暮含佳氣池影搖輕風林光淡
新霽支頤藉芳草自足忘世事未得歸去來聊爲
宴居地

王禹偁

陽水篆

泠泠庶子泉落落陽水筆雲氣勢奔垂龍蛇互蟠

屈嶧碑旣剝滅石鼓亦缺失惟茲數十字遒勁倚
雲窟模印徧華夷流傳耀紺帙書誠一藝爾小道
詎可忽乃知出人事千古名不沒

揚州池亭卽事

冥心閱羣動亦各趨所安胡爲名利人戚戚常鮮
歡吾生四十四結珮呼郡官掌言入綸閣待詔直
金鑿匪謂得祿少所嗟行道難前年謫滁州憂時
雙鬢殘賴有琅邪溪時濯塵纓冠朝僉徒淮海任
重力易殫君恩詎可報感激涕汎瀾民瘼不能治

五古一
側隱情悲酸况復多病身名宦心已闌歸田未果
決懷祿尙盤桓公退何所適池亭一凭闌旭日媚
春卉微風生鳴湍呵僮勿挾彈戒客莫持竿用翼
魚鳥馴熙熙肆游觀神仙未可學吏隱聊自寬孤
吟刻幽石此義非考槃

寇準

雪霽池上

霽雪池上亭晴光扇泉石暖覺岸冰消靜聞簷溜
滴務簡身暫閒景幽心自適極目望南山圭峯露

微碧

長郊雨餘遠樹減翠新蟬忽鳴激耳嘹唳
久客孤坐情如何哉形之於文聊以自
遣

遙山夏雨歇遠樹涼風至憑欄偶開襟新蟬動秋
思沙溪潔細流庭木驚疎翠節候又復然幽憂斯
所萃芳歲若奔流羲光不停轡感物悼前期誰知
此時意

韓丕

寄岳陽劉從事

秋來憶故人
寓目臨大野
遠近聞清商
依稀奏幽雅
經霜樹半紅
無風葉自下
一片洞庭心
聊憑塞鴻寫

种放

夏日山居

陰陰林木靜
寂寂無人境
紅綻紫葳香
嵐沈玉膏冷
看雲時獨坐
慎事常中省
何客馭風來
新篁動疎影

晏殊

和王校勘中夏東園

東園何所樂
所樂非塵事
野竹亂無行
幽花晚多思
閒窺魚尾赤
暗辨蜂腰細
樹影密遮牀
藤梢狂冒袂
潘蔬足登膳
陶秫徑取醉
幸獲我汝交
都忘今昔世
歡言捧瑤佩
願以疎麻繼

范仲淹

中峯

高高最高處
逸客偶登臨
迴看日月影
正得天地

心念此非常遊千載一披襟

拜馬澗

傳聞王子晉澗邊遺一驥當時青雲路鷄犬亦可致未必真龍媒悠悠在平地

公路澗

嵩高發靈源北望洛陽注清流引河漢白氣橫雲霧英雄惜此地百萬會相距近代無戰爭常人自來去

韓琦

畫錦堂

古人之富貴歸於本郡縣譬若衣錦遊白晝自光緇不則如夜行雖麗胡由見事累載方冊今復著俚諺或紆太守章或擁使者傳歌樵忘故窮滌器掩前賤所得快恩仇愛惡任驕惰其志止于此士固不足羨茲予來舊邦意弗在矜衒以疾而量力懼莫稱方面抗表納金節假守翼鄉便帝曰其汝俞建燾往臨殿行路不云非觀歎溢郊甸病軀諧少休先隴遂完繕歲時存父老伏臘潔親薦恩榮

孰與偕衰劣愧獨擅公餘新此堂夫豈事飲燕亦
非張美名輕薄詫紳弁重祿許安閒顧已常兢戰
庶一視題榜因思報主眷忠義聳大節匪石烏可
轉丹忱難悉陳感泣對筆硯

文彥博

關山月

客子久行役遼西戍未還佳人怨遙夜清淚裊朱
顏蘚晦蘭閨寂塵昏寶鑑閒相思不相見明月下
關山

長相思

遠別苦無悰離居常戚戚顧慕懷所歡徘徊彌自
惜瓊蘂不可采瑤華未堪摘惟憑尺錦書一寄長
相憶

折楊柳

長憶都門外低垂拂路塵更思南陌上攀折贈行
人行人經歲別楊柳逐年新何當逢塞雁重寄一
枝春

夜夜曲

明月流清漢娟娟照洞房微風吹敗葉颯颯下銀
牀塵晦流黃素鑪銷辟惡香年年機杼妾獨怨夜
何長

塞下曲

老上焚庭後昆邪右衽時休開小月陣罷禱拂雲
祠徒覺筋竿勁寧聞羽檄馳祁連皆積雪渠答夜
應施

朔漠凝寒久窮荒氣候賒凍雲藏虎谷殘雪滿龍
沙地迴胡風急天高漢月斜何人動鄉思隴上聽

金笳

招劉伯壽祕監

君自山中來孰見山中事我亦山中人素懷歸山
志切望青牛車細問歸山計

王琪

秋日白鷺亭向夕有作

白鷺敞西軒檐宇窮爽塏千峯若聯環翠色不可
解是時天宇曠六幕無纖靄金斗熨秋江素練橫
衣帶乾坤清且斂氣象朝昏改蘆花作雪風飛舞

來滄海九霄汀鷺起萬里檣烏快月上三山頭鳥
沒橫塘外蒼茫洲渚寒錯落星斗大開樽屏絲竹
披襟向簫籟余生本江湖偃蹇欣所會清興雖自
發苦嗜亦吾累魚龍憑夜濤四面忽滂湃安得然
犀燈煌煌發水怪

黃亢

臨水

人生朝復暮水波流不駐去年此日水今日到何
處惆悵雨殘花嫣紅隨水去花落水東流識盡人

生趣

石介

三豪詩送杜默師雄

本朝八十年文人爲多若老師宿名不敢論數
近世作者石曼卿之詩歐陽永叔之文辭杜師
雄之歌篇豪於一代矣師雄學於予辭歸作三
豪詩以送之

曼卿豪於詩社壇高數層永叔豪於辭舉世絕儔
朋師雄歌亦豪三人宜同稱曼卿苦汨沒老死殿

中丞身雖埋黃泉詩名長如水永叔亦連蹇病鸞
方騫騰四海讓獨步三館最後登師雄二十二筆
距寧如鷹才格自天來詞華非學能廻顧李賀輩
麤俗良可憎玉川月蝕詩猶欲相憑凌曼卿苟不
歿其才堪股肱永叔氣甚闕用之王道與師雄子
勉旃勿便生驕矜

蘇舜欽

夜聞秋聲感而成詠同鄰幾作

八月天氣肅萬物日已闌庭前兩高桐夜來如哀

絃志士感節物終夕耿不眠起聽抱膝吟悲烈聲
相干念此華葉改想見顏色鮮顧人生世間榮悴
理亦然豈傷歲月速愧無功名傳少小學文章出
值用武年儒冠多見侮敢爲戰士先欲棄俎豆事
強習孫吳篇迂鈍不可爲屈曲良亦難虛言盜祿
食實又畏上天未能追世好且樂樽酒閒九日近
不遠同醉黃花前

維舟野步呈子履

白日出高岡遠野春氣動蒼鳩鳴相歡幽草色已

弄繫舟大河曲登步目一縱逍遙翫物華所樂與
君共已忘竄逐傷但喜懷抱空古人負才業未必
爲世用吾儕性疎拙擯棄安足痛四顧不見人高
歌免驚衆

巳卯冬大寒有感

延川未撤警夕烽照冰雪窮邊苦寒地兵氣相躔
結主將初臨戎猛思風前發朝霞吹餘哀疊鼓暮
不絕淹留未見敵愁端密如髮予聞古烈士自誓
立壯節九泥封函關長纓繫南越本爲朝廷羞寧

計身命活功名非與期冊書豈磨滅然由任遇專
醜類易翦伐訓士無他才賞罰在果決近聞邊方
奏申覆多沉沒罪者旣稽誅功者不見閱雖使頗
牧生勇智當坐屈或云廟堂上與彼勢相戛恐其
立異勲歛然自超拔不知百萬師寒刮膚革裂關
中困誅斂農產半匱竭我欲叫上帝願帝下明罰
早令若輩亾無爲生民孽

金山寺

孤峯湧滄江突兀臺殿積驚波四面起日夜走礚

五古一
礪陰壑畜風雲陽崖產金碧離披萬年樹根抱太古石修廊轉峻閣窈窕壓山脊寶像浮海來珠纓冷光滴叩欄見鼉鼉揚首意自得偃蹇互出沒甘此飽餘食又有翠羽禽羣飛喜賓客口銜紺蒂花近我若相識開軒必曠絕上下無異色氣象特清壯所覽輒快適余心本高灑悞爲塵土隔不知人間世有此物外迹落日將登舟低回空自惜

送關永言赴彭門

鄙性背時向處身介且迂自固以爲節人皆指爲

愚少年宦京邑與衆頗異涂一朝被放廢飄然落江湖江湖信美矣心迹益更孤永言金閨彥器識當世無機發絃上矢辨走盤中珠高風落溪山恥與勢利趨殊科二十年不肖仕京都顧我窮悴者一笑情相於日夕奉盃宴但覺懷抱攄瓊琚照坐席內顧瓦礫粗未飲心自醉相對氣已舒得忘羈旅憂蓋以道義俱雲間宿古寺花下招歌姝勝境尋已遍賞心未嘗辜壘書促赴治候吏擁舳艫秋風卷大旆喧喧指東徐郊亭對別酒我獨增悲吁

人生大塊間氣類實萬殊賢愚各有合惟予邈無
徒君子誤見知交契若勘符一旦又睽索千里成
濶疎期君早自奮佐時發雄圖功成速收身單舸
還東吳白頭青林下罇酒相從娛

梅堯臣

武陵行

生事在漁樵所居亦烟水野艇一竿絲朝朝狎清
泚忽自傍藤陰乘流轉山背始覺景氣佳潛通小
谿裏常時不見春入谷驚花蘂幽興窮綠波蕪芳

心莫已花外一峯明林間小洞啓遙聞鷄犬音漸
悟人烟邇

野田行

輕雷長陂水農事乃及辰茅旌送山鬼瓦鼓迎田
神青臯暗藏雉萬木欣已春桑間耦耕者誰復來
問津

漁舟火

蘆洲一點明知有漁人泊江暝杳不分誰方在高
閣是時孤雁去應認光中落

發昭亭

春泥深一尺車馬重重跡親舊各還城山川空向
夕今朝水平岸不畏舟礙磧始隨湍漲發已入青
蒼壁落日未逢人孤村望來客泱泱漫田流青青
被隴麥欲霽鳩亂鳴將耕杏花白我無農畝懃千
里事行役寄謝昭亭神果不吝深澤

舟中夜與家人飲

月出斷岸口影照別舸背且獨與婦飲頗勝俗客
對月漸上我席暝色亦稍退豈必待秉燭此景已

可愛

夜賦

月從東殿生叢竹照修竦葉間清露滴枝上寒禽
動閒覺萬慮空靜聞嚴鼓重官燭翦更明相看應
似夢

朔風寄永叔

朔風嗥枯枝遠雁不能起日色寒無光原野澹千
里所思在南國遐路濶音旨潛鱗亦安託冰結長
河水峩峩旣未泮獵獵終不已悠然傷我心歷亂

非可擬

月夜與兄公度納涼間行至御橋

夕月吐澄明陰雲淨如掃空庭引天翠爽氣生懷
抱家近御橋頭因爲橋畔遊倚欄波上影不其水
東流思歸此清夜何處是江樓四望遠寂歷微風
動颼颼觀闕垂萬象山河趨九州壯哉帝王宅顧
我一蜉蝣富貴非可取田園今向秋明當拂衣去
試與問扁舟

陸子履示秦篆寶

其文曰二十六年皇帝
盡并兼天下諸侯黔首

大安號爲皇帝乃詔丞相斯法度量則
不一嫌疑者皆明一之

秦旣并諸侯斯乃一度量鑄寶以永傳萬世俾勿
喪精銅不生花小篆著丞相一沒咸陽宮千秋事
更王陸君居洛城客有來渭上曰因農人耕發壤
破古藏遂獲此物還文完字何壯始號爲皇帝立
語已超曠意將愚黔首釁起危博浪其後同玉璽
不隨驪山葬今蓄於君家徒爾資奇尙物以用爲
珍異時皆似矣

和師直早春雪後五隴道中作

來尋谷口春正值陰雲結日暮冰霰繁宿亭虛飯
設侵晨登隴去始見羣峯列草凍未抽心松枯猶
抱節川傍認飛鷺林上墜殘雪何意待芳菲遲留
未堪折

雪夜留梁推官飲

晝雪落旋消夜雪寒易積燈青古屋深爐凍殘烟
碧爲沽一斗酒暫對千里客酒薄意不淺輕今須
重昔昔重是年華飄飄猶過隙一醉冒風歸平明
馬無跡

伊川

山斷瀉伊流灘聲朝暮急東渡馬將登西隄人已
立日看東西舟爭途如不及誰見捕魚郎寒蓑雨
中濕

石樓

山腰古石樓杳靄石梯上低窺巖際樹對見龕中
像簷遮嵩雲飛檻逼伊湍響同遊已零落歲月成
俯仰

歐陽修

下山

行歌翠微裏共下山前路千峯返照外一鳥投巖
去渡口晚無人繫舸芳洲樹

上方閣

聞鐘渡寒水共步尋雲嶂還隨孤鳥下却望層林
上清梵遠猶聞日暮空山響

魚罾

春水弄春沙蕩漾流不極冬簷苦難滿終日沙頭
客向暮卷空罾棹歌菱浦北

伊川獨遊

東郊漸微綠驅馬忻獨往梅繁野渡晴泉落春山
響身閒愛物外趣遠詣心賞歸路逐樵歌落日寒
川上

答錢寺丞憶伊川

之子問伊川伊川已春色綠芷雜芳浦青溪含白
石山阿昔留賞屐齒無遺迹惟有岩桂花留芳待
歸客

寄左軍巡劉判官

遙聽洛城鐘獨渡伊川水綠樹鬱參差行人去無
已因高望京邑驅馬汾山趾落日亂峯多龍門何
處是

箕山

朝下黃蘆坂夕望箕山雲緬懷巢上客想彼岩中
人弱歲慕高節壯年嬰世紛漱流羨潁水振衣嗟
洛塵空祠亂驚烏山木含餘暉聊茲謝芝桂歸月
及新春

別聖俞

車馬古城隅喧喧分曉色行人念歸塗居者徒慘
惻薄宦共羈旅論交喜金石薦以朋酒歡寧知歲
月適人事坐云變出處俄乖隔關山自茲始揮袂
舉輕策歲暮寒雲多野曠陰風積征蹄殘嚴霜別
酒臨長陌應念同時人獨爲未歸客

送劉十三南遊

泱泱汴河流櫓聲過晚浦行客問吳山舟人多楚
語春深紫蘭澤夏早黃梅雨時應賦登眺聊以忘
羈旅

西園

落日叩溪門西溪復何所人侵樹裏耕花落田中
雨平野見南山荒臺起寒霧歌舞昔云誰今人但
懷古

夜聞風聲有感奉呈原父舍人聖俞直講
夜半羣動息有風生樹端颯然飄我衣起坐爲長
歎苦暑君勿厭初涼君勿歡暑在物猶盛涼歸歲
將寒清霜忽已飛零露亦溥溥霜露本無情豈肯
私蕙蘭不獨草木爾君形安得完櫛髮變新白鑑

容消故丹風埃共侵迫心志亦摧殘萬古一飛隼
兩曜雙跳丸擾擾賢與愚流沙逐驚湍其來固如
此獨久知誠難服食爲藥誤此言真不刊但當飲
美酒何必被輕紈

送唐生

一作送唐秀才歸永州

京師英豪域車馬日紛紛唐生萬里客一影隨一
身出無車與馬但踏車馬塵日食不自飽讀書依
主人夜夜客枕夢北風吹孤雲翩然動歸思旦夕
來叩門終年少人識逆旅惟我親來學媿道懵贈

歸慚橐貧勉之期不止多獲由力耘指家大嶺北
重湖浩無垠飛雁不可到書來安得頻

讀書

吾生本寒儒老尚把書卷眼力雖已疲心意殊未
倦正經首唐虞僞說起秦漢篇章異句讀解詁及
箋傳是非自相攻去取在勇斷初如兩軍交乘勝
方酣戰當其旗鼓催不覺人馬汗至哉天下樂終
日在几案念昔始從師力學希仕宦豈敢取聲名
惟期脫貧賤忘食日已晡然薪夜侵旦謂言得志

後便可焚筆硯少償辛苦時惟事寢與飯歲月不
我留一生今過半中間嘗忝竊內外職文翰官榮
日清近廩給亦豐美人情慎所習醜毒比安宴漸
追時俗流稍稍學營辦盃盤窮水陸賓客羅俊彥
自從中年來人事攻百箭非惟職有憂亦自老可
歎形骸苦衰病心志亦退悞前時可喜事閉眼不
欲見惟尋舊讀書簡編多朽斷古人重溫故官事
幸有閒乃知讀書勤其樂固無限少而干祿利老
用忘憂患又知物貴久至寶見百鍊紛華暫時好

俯仰浮雲散淡泊味愈長始終殊不變何時乞殘
骸萬一免罪譴買書載舟歸築室頽水岸平生頗
論述詮次加點竄庶幾垂後世不然死芻豢信哉
蠹書魚韓子語非訕

病中聞梅二南歸

聞君解舟去秋水正泔泔野岸曠歸思都門辭世
紛稍逐商帆伴初隨征雁羣山多淮甸出柳盡汴
河分楚色蕪尚綠江烟日半曛客意浩已遠離懷
寧復云宣城好風月歸信幾時聞

幽谷

一作豐樂亭

晚飲

一徑入蒙密已聞流水聲行穿翠篠盡忽見青山
橫山勢抱幽谷谷泉含石泓旁生嘉樹林上有好
鳥鳴鳥語谷中靜樹涼泉影清露蟬已嘒嘒風溜
時泠泠渴心不待飲醉耳傾還醒嘉我二三友偶
同丘壑情環流席高蔭置酒當崢嶸是時新雨餘
日落山更明山色已可愛泉聲難久聽安得白玉
琴寫以朱絲繩

聚星堂前紫薇花

五古
三
亭亭紫薇花向我如有意高烟晚冥濛清露晨點
綴豈無陽春月所得時節異靜女不爭寵幽姿如
自喜將期誰顧眄獨伴我憔悴而我不強飲繁英
行欲墜相看兩寂寞孤詠聊自慰

憶山示聖俞

吾思夷陵山山亂不可究東城一堠餘高下漸岡
阜羣峯迤邐接四顧無前後憶嘗祇吏役鉅細悉
經覲是時秋卉紅嶺谷堆纈繡林枯松鱗皴山老
石脊瘦斷徑履頽崖孤泉聽清溜深行得平川古

俗見耕耨澗荒驚麀奔日出飛雉雊盤石屢欹眠
綠巖堪解綬幽尋歎獨往清興思誰侑其西乃三
峽嶮怪愈奇富江如自天傾岸立兩崖鬪黔巫望
西屬越嶺通南奏時時縣樓對雲霧昏白晝荒烟
下牢戍百仞寒溪漱蝦蟆噴水簾甘液勝飲酎亦
嘗到黃牛泊舟聽猿狖巉巉起絕壁蒼翠非刻鏤
陰岩下攢叢岫穴忽空透遙岑聳孤出可愛欣欲
就惟思得君詩古健寫奇秀今來會京師車馬逐
塵簪頽冠各白髮舉酒無茜袖繁華不可慕幽賞

亦難邁徒爲憶山吟耳熱助嘲詬

奉答原甫九月八日見過會飲之作

老大惜時節少年輕別離我歌君當和我酌君勿
辭豔豔庭下菊與君吟繞之擷其黃金藥泛此白
玉卮君勿愛此花問君此何時秋風日益高霜露
漸離披芳歲忽已晚朱顏從此衰念君將捨我車
馬去有期君行一何樂我意獨不怡飛兔不戀羣
奔風誰能追老驥但伏櫪壯心良可悲

余靖

山寺獨宿

柴車走縣封窮途秋耿耿急雨失溪聲殘燈淡窗
影驅馳下士身淒切旅人景山寒夢難成始識今
夜永

蔡襄

留別舊居花檻

別意起中夕出門風吹衣側月光豔薄餘花香氣
微清尊歲相向欲去心有違殘葩勿盡放主人行
亦歸

江休復

秋懷

西風萬里至曠然天地秋暮雨生夕涼百蟲鳴啾
啾楚山曉蒼蒼楚水亦悠悠騷人試登臨感物增
離憂所思在遐方欲往路阻修香草有蕙茝嘉樹
有梧楸白露委芳馨彫零使我愁窮年倦羈窘江
湖思舊遊紉蘭製芰荷飄泛一葉舟肆情雲水間
意適何所求

傅堯俞

讀書

吾屋雖喧卑頗不甚蕪穢置席屋中間坐臥羣書
內橫風吹急雨入屋灑我背展卷殊未知心與古
人會有客自外來笑我苦癡昧何致雨侵衣屢問
我不對必欲窮所因起答客亦退聊復得此心露
濕寧足異

范純仁

留別洛中諸友

少孤多旅游解驂幸吾里親友皆賢豪相逢有餘

喜世事如浮雲離合寧暫止酒罷予其東幽蹤逐
伊水

同成都尹吳仲庶運判韓持正會飲

宦游鮮寧居未定卽奔走踰年官岷峨較昔已云
久所喜風物繁聯職多舊友平生道義心相期各
白首公餘自招尋談笑共尊酒時方積雨歇涼風
生戶牖紅蕖照平池蒼烟羃高柳清歡正蕭散離
思已紛糾後遇復何鄉此樂能再不念初撫遐氓
力薄顏亦厚飽歷風波危僅脫虎狼口何當挂塵

冠杖屨醉林藪俯仰適所願榮利亦何有世故浩
難必逍遙慕莊叟

累約舍弟純禮以職事未至

落葉猶同飛寒鳥猶並枝我汝獨何負不得長相
隨偶爲細累拘跬步成天涯後日更遠適會合倍
難期尚願家國寧且作千日離悠悠百年間幾別
顏卽衰從宦非我志功名徒自欺雖言千寸祿坐
使手足違逐末背本心得一萬已遺爾我粗有識
此事良同悲安得長洲田清水稻百畦將汝入故

廬親戚坐成圍幼弟就文史長兄近砭醫孝謹奉
諸宗祭祀潔四時此外逐風月對酌白酒卮畢世
爲善人不負生育慈斯志倘未遂終爲路旁嗤

趙抃

寄酬蔡州王正言

自顧愚無堪老大何所用得郡江湖來一意雲泉
縱驚此西南身連夕東北夢乃知故人念許與明
月共荆書一紙賢季諾千金重寄我瓊瑤篇使得
長諷誦寒松有唳鶴高梧有鳴鳳何日謝知音爲

鼓商絃弄

贈陽安徐邁表兄屯田

少時所學苦食蘖日自強壯歲從宦清飲水中剛
腸陽安百里地邈在天一方惠政不鞭朴期民樂
耕桑念予昨守贛與兄會家鄉兄今歲已滿余遽
提蜀疆一朝此邂逅五載忘參商且勿語離索易
老驚髣霜且勿較通塞放懷把酒觴上方聖政新
求賢坐明堂兄道足施設兄志彌頡頏喜予外祖
門從此生輝光

鄭獬

採鳧茨

朝攜一筐出暮攜一筐歸十指欲流血且急眼前
饑官倉豈無粟粒粒藏珠璣一粒不出倉倉中羣
鼠肥

積書巖宋詩刪第二卷目錄

五言古詩二

司馬光 九首

韓維 十二首

鄭俠 一首

李覲 一首

黃庶 二首

邵雍 三首

王令 六首

王安石 二十首

王安國 一首

曾鞏 七首

蘇軾 十六首

蘇轍 三首

鮮于侁 一首

章綯 二首

文同 五首

年
茶
二
首

積書巖宋詩刪卷二

錫山顧貞觀梁汾選

武陵胡獻徵存人閱

五言古詩二

司馬光

獨樂園 七詠之四

吾愛董仲舒窮經守幽獨所居雖有園三年不游
目邪說遠去耳聖言滿充腹發策登漢庭百家始

消伏 讀書堂

吾愛嚴子陵羊裘釣石瀨萬乘雖故人訪求失所
在三公豈非貴不足易其介奈何夸毘子斗祿窮
百態釣魚菴

吾愛韓伯休采藥賣都市有心安可欺所以價不
二如何彼女子已復知姓字驚逃入窮山深畏名
爲累采藥圃

吾愛王子猷借宅亦種竹一日不可無瀟灑常在
目雪霜徒自白柯葉不改綠殊勝石季倫珊瑚滿
金谷種竹齋

春塘水

春塘含薄水淅瀝隱隈曲晴日射寒芒柔風折哀
玉草樹曾未知波光已先綠

寒溪石

穹石正嶄岩寒流更清激霜飛黃葉擁波濺蒼苔
涇溪水勿劇來沙鶴方孤立

漁洲火

漁翁繫葉舟遠映楓林宿手攜雙白魚呼兒爨山
竹深夜寂無人明滅寒山曲

再柬友人

故人音信絕對月動相思清露滴梧葉此懷當告
誰秋風廣陵郭正是望濤時

小雨

雲日互出沒數朝飛雨清曠曠似欲止廉纖還未
晴映空輕絲亂著物細珠明葉端危不隕荷心重
忽傾喜涼高燕舞便溼羣蛙鳴于余亦有得藥畹
胡麻生

韓維

晚過葆光亭步月

浮沈間里間放志謝維繫行貪月色靜歸犯霜華
濕寒鼓出城重飛星過樓急却想竹庭下主人猶
獨立

舟中夜坐

晴霜落波底斗柄插隄外扁舟燈火明樽酒夜相
對臨歡意暫遣念離心已痲篙師喜水拆理檝事
晨邁

利涉埕院

院有呂文穆讀書堂利涉法師

許公讀書地塵緣一來拂門掩僧不歸簷低鷺飛
出高人不可見石墪鎮寒骨

盧溪

盧攜讀書處

伊人沒已久溪溜亦如綫淳氣揖老僧清音坐春
院始悟入山深幽林鳥聲變

西溪

我從南嶺來引轡下雲木不知溪流處但見翠滿
谷涼葉覆山泉修篁翳茅屋

鋤園

上天浩無私衆草同一榮青青十步間薰臭相雜
并卉藥數不多十百其品名蔓者善緣附結陰在
高薨修竹雖自立已復困纏縈其餘叢與株蕪沒
不自呈陰蟲宥其下日夜百種鳴紛然亂耳眼我
意初不平朝鋤忽以盡暮雨且復生自念疲病者
莫與地力爭盛衰固物理安用勞我形

南溪

長林拂雲根一逕絕城腹荆扉帶翠樾斗下地愈
束清溪自南來勢抵北崖曲溝平水流漫東去入

修竹境幽百物遂魚鳥得所欲况依仁者居不與
釣彈觸有時佳賓至相與娛聽矚鳥飛鳴我傍魚
泳出深淥薄暮登前岡四顧山在目雨滋春稼繁
風動野花馥達人樂天性不待外物足遂令茲地
勝久不事營築顧我指崖下秋當結茅屋渠波環
古臺輦石坐幽澳霜前復來觀兔肥山酒熟

和三哥入山

巢由没已久風迹曠不嗣長嘯箕穎間悲風肅然
至傳聞龍山下茅屋架三四中有隱者棲讀書樂

仁義飽觀人事變深鈎易象祕耕田給衣食鄉里
霑賑遺呦呦山鹿羣摩撫馴不畏乃知至仁心足
以通異類聲名自馳擊我心晏無累寤寐想斯人
安得同所致

同陳太丞遊龍興寺經藏院

空堂灑寒水碧楸涼漠漠高眠得珍簟委棄巾與
屨薰風穆然來殿角鳴金鐸清香有時聞幽鳥無
聲落論詩愛平淡語道造冲寞非吾方外友誰當
共茲樂

同曼叔遊菩提寺

高城如破崖寺帶喬木古禪房掩清晝佛畫剝寒
雨荒池野蔓合濁水佳蓮吐蕭條聯騎遊淡薄對
僧語秋風日夕好勝事從此數

和永叔小飲懷同州江十學士

翰林文章伯好古名一家無金壁儲所寶書與
器北堂冬日明有朋聯騎至新樽布几案二鼎屹
先置大鼎葛所銘小鼎澤而淬坐恐致神物光怪
發非次羣賢刻金石墨本來四裔紛穰羅卷軸指

擿辨分隸其中石贊藏家法非一二精莊與飄逸
兩自有餘意興來輒長歌歡至遂沈醉顏饑足簞
瓢韓飲尚文字乃知內可樂不必鐘鼓貴温温江
馮翊茲理久所詣賦詩多雅言嗜酒見淳氣歲晏
不在席使我增歎喟

曉出郊過方秀才舍飲

浮雲散朝陰初日動晴煦行隨風葉遠去傍田家
路人閒無遽色馬緩有安步遙識主人舍青帘出
霜樹

鄭俠

示潮州吳宅三甥

大郎性純淑至寶受磨琢二郎姿秀美白璧光閃
爍三郎神照藏宛若雛在殼五彩翔鳳翰參差見
斑駁三人吾令甥亦常從吾學昊穹有顯道報應
無舛錯未有祖慶厚而招子孫薄二親又善教曾
不閒飲啄甥雖多似舅三子自超卓爲文要根理
覽古務詳博不惟子三人萬世同矩矱慎勿學舅
癡直指世姦惡心雖在規益世誰愛忠諤立身旣

不危青雲任拏攫

李觀

魯公碑

他人工字書美好若婦女猗嗟顏太師赳赳丈夫
武麻姑有遺碑歲月亦已古硬筆可破石鐫者疑
虛語驚龍索雷鬪口吐天下雨怒虎突圍出不畏
千強弩有海珠易求有山玉易取惟恐此碑壞此
書難再覩安得同寶鎮收藏在天府自非大祭時
莫教凡眼覩

黃州庶

青巖再宿趙屯

蘆花一曲水弭楫日已暮山間聞鷄犬無人見烟
樹行逐羊豕跡始識入山路菱芡與魚蟹居人足
來去漁家無鄉縣滿船載稚乳鞭笞公私急醉睡
聽秋雨

次韻和子儀聞蟬

落日挂樹間長我庭下陰園林動秋意高蟬忽微
吟清風轉餘響悠然下遙岑微物感時節鐸鉤吐
商金古樂久破碎茲蟲抱全音荒忽尚偃蹇激起
壯士心願爲秋蟬操被之朱絲琴

邵雍

秋懷

晴窗日初曛幽庭雨乍洗紅藥靜自披綠竹閒相
倚榮利浮若雲懷情淡如水身非天外人意從天
外起

高竹

高竹碧相倚自能發餘清時時微風來萬葉同一

聲道汗得夷理物虛含遠情階前閒步客意思何
清平

鳳州郡樓上書所見

楊柳垂青青風動如飛蓋危樓思不窮盡日間相
對鳥去林自空雲移山不礙画角時斷續層崖遞
明晦殘陽挂雙虹遠水生微瀨久客屬東望意與
孤鴻會

王令

雜詩

方春不種蘭終歲無自佩良田弗加芟徒穉亦無
歲空令雨露恩日夕被蒿艾安坐饑怨天此理果
誰在

秋夜

秋夕不自曉百蟲齊一鳴時節適使然鼓脅亦有
聲爭喧鼠公盜窳宰蛇陰行獨有東家雞苦心爲
昏明

中夜

晝日苦卒卒忽焉不加思長夜漫不眠起復日所

爲所爲浩多愧不與初心期虛云聖賢學實從庸
俗歸雖恥猶奈何長歌涕垂頤

夏日平居奉寄崔伯易兼簡朱元弼

天風變春和晝日差夏永門闌閒無事燕雀去益
靜紛翻詩書帙棄散懶收整時來就枕臥復亦取
窺省心恬逐物閒迹濶與世屏鮮鮮南山暖秀色
上修嶺苟嫌安坐慵還可遠游騁自緣智能薄反
得閒暇幸交朋久相遠疎懶欲誰警

野步

久嬰末俗喧脫就綠野靜方求巾屨便那暇賓客
命林紅落春衰草綠爭夏盛時從老農語久佇行
子聽謂言勞苦後各以閒暇慶時逢餅盎沽亦有
肴核稱喧嘲忽無次歌唱仍相詠酒闌紛起坐白
髮忽兩凭兒乘旁樹嬉牛臥前籬瞑子方困俗累
愛此近天性何當從之歸買舍與相並

旅次寄寶覺訥師

小雨破宿暑曉風忽焉適山深樹翳陰蝸蝻應已
秋清坐想高絕語言誰應酬豈不念一往抱病終

自留羈旅少往還有來或非壽命僕一謝之縱我
寇屨休移牀上高堂解書散牀頭于此有佳興念
世誰與謀獨思山林人茲意可綢繆何當買田廬
共遂丘壑游

王安石

卽事

我起影亦起我留影逡巡我意不在影影長隨我
身交游義相好骨肉情相親如何有乖睽不得同
苦辛

昏昏白日臥皎皎中夜愁明月入枕席涼風動衾
幘蠶蟬相鳴悲上下無時休徒能感吾耳顧爾安
知秋

日月隨天旋疾遲與天謀寒暑自有常不顧萬物
求蜉蝣蔽朝夕螻蛄疑春秋眇眇上古曆回環今
幾周

東門

東門白下亭摧甍蔓寒葩淺沙杙素舸一水宛秋
蛇漁商數十室門巷隱桑麻翰林謫仙人往歲酒

姥家調笑此水上能歌揚白花楊花飛白雪枝裊
綠烟斜舞袖卷烟霏綺裘明紫霞風流翳蓬顆故
地使人嗟迢迢陌頭青空復可藏鴟

仲明父不至

月出映溝坻烟升隱墟落寒魚占窟聚暝鳥投枝
泊亭臯閒晚市隴首歸新獲佇子終不來青燈耿

林壑

次韻舍弟江上

岸紅歸欲稠渚綠合猶晚晴沙上屐輕暖水隨帆

遠吹波戲魚動掠葉飛禽返著意覓幽蹊桃花悞
劉阮

西風

少年不知秋喜聞西風生老大多感傷畏此蟋蟀
鳴况乃捨親友抱病獨遠行中夜臥不周惻惻感
我情起視天正黑弱雲亂縱橫似有霰雪飄不復
星斗明時節忽如此重令壯心驚諒無同憂人樽
酒安可傾

散髮一扁舟

散髮一扁舟夜長眠屢起秋水瀉明河迢迢藕花
底愛此露的皦復憐雲綺靡諒無與歌絃幽獨亦
可喜

騏驥在霜野

騏驥在霜野低徊向衰草入櫪聞秋聲悲鳴思長
道黃金作鞭轡粲粲空外好人人生貴得意不必恨
枯槁

乙巳九月登冶城作

欲望鍾山岑因知冶城路躋攀隱木杪稍記曾遊

處紅沉渚上日蒼起榛中霧卽事有哀傷山川自
如故

寓言

遊鯨厭海濁出戲清江湄風濤助翻騰網罟不敢
窺失身洲渚間螻蟻乘其機物大苦易窮一窮無
所歸

寄曾子固

巖巖中天閣靄靄層雲樹爲子望江南蔽虧無行
路平生湖海士心迹非無素老矣不自知低徊如

自悞傷懷西風起心與河漢注哀鴻相隨飛去我
終不顧

雜詠

懷王自墮馬賈傅至死悲古人事一職豈敢苟然
爲哭死非爲生吾心良不欺滔滔聲利間絳灌亦
何知

獨臥有懷

午鳩鳴春陰獨臥林壑靜微雲過一雨浙瀝生晚
聽紅綠紛在眼流芳與時競有懷無與言佇立鍾

山暝

強起

寒堂耿不寐轆轤聞車聲不知誰家兒先我霜上
行歎息夜未央遽呼置前楹推枕欲強起問知星
正明昧旦聖所勉齊詩有鷄鳴嗟予以竊食更覺
負平生

自舒州追送朱氏女弟憩獨山館宿木瘤

僧舍明日度長安嶺至皖口

晨霜踐河梁落日憩亭皋念彼千里行惻惻我心

勞攬轡上層岡下臨百仞濠寒流咽欲絕魚鼈久
已逃暮行苦遶迴細路隱蓬蒿驚麈出馬前鳥駭
亾其曹投僧避夜雨古檠昏無膏山木鳴四壁疑
身在波濤平明長安嶺飛雪忽滿袍天低浮雲深
更覺所向高

夜夢與和甫別如赴北京時和甫作詩覺

而有作因寄純甫

水菽中歲樂鼎茵暮年悲同胞苦零落會合尙悽
其况乃夢乖濶傷懷而賦詩詩言道路寒乃似北

征時叔今今安否季也來何遲中夜遂不眠輾轉
涕流離老我孤主恩結草以爲期與叔善事國有
知無不爲千里永相望昧昧我思之幸惟季優游
歲晚相攜持於焉可晤語水上有茅茨畹蘭佇歸
憩遶屋正華滋

送李屯田守桂陽

泊船香爐峯始與子相識寄書邗江上詒我峯下
石緣似湘水竹攜持與南北永懷故人歡不願百
金易竹枯歸樵蘇石爛棄沙礫夷門得邂逅綠髮

皆半白追思少時事俛仰如一夕老矣無所爲空
知念疇昔常思一盃酒要子相解釋出門事紛紛
歸臥意還徂聞當上湓水持詔守嶺阨方爲萬里
別執手先慘戚茲游信浩蕩山水多所得爲我謝
香爐風塵每相憶

得曾子固書因寄

始吾居揚日重問每見及云將自親側萬里同講
習子行何舒舒吾望已汲汲窮年夢東南顏色不
可挹仁賢豈欺我正恐事維繫嚴親抱憂衰生理

賴以給不然航江外天寒北風急無乃山路惡僕
弱馬行澀孤懷未肯開歲物忽如蟄竭來高郵住
巷屋頗卑濕蓬蒿稍芟除茅竹隨補葺苟云禦風
氣尙恐憂雨汁故人莫在眼屢獨開巾笈忠信蓋
未見吾敢誣茲邑出關誰與語念子百憂集眺聽
聊自放日暮城頭立徐歸坐當戶使者操書入開
時識子意如渴得美湑驪駒日就道玉手行可執
舊學待鐫磨新文得刪拾重登城頭望喜氣滿原

隰

別孫莘老

逢原未熟我已與子相知自吾得逢原知子更不
疑把手湖上舟望子欲歸時茫然乃分散獨背東
南馳寥寥西城居邂逅與子期鷄鳴入省門朱墨
來紛披含意不自得強顏聊爾爲會合常在夜青
燈照書詩往往並衾語至明不言疲忽忽捨我去
使我當從誰送子不出門我身方羈縻我心得自
如今與子相隨隨子在湖上逢原所常嬉想見荷
葉盡北風捲寒漪已懷今日愁更念昔日悲相逢

亦何有但有鏡中絲

王安國

夏日獨居

竹苗敷夏陰蘿蔓蔽朝亮感此節物佳百骸適無
恙委蛇投廣廈簫瑟絕遺響稍讐簡編餘俄得冠
裾放身雖勢利乖心隨絃歌尙默然想聖賢游世
無得喪抱關秉翟間未分棄冗長人生適意難聊
各安所鄉

曾鞏

詠史

京室天下歸飛薨無餘地國士憂社稷塗人養聲
利貴賤競一時峩冠各鱗次子龍獨幽遠聘召漠
無意
子雲無由歸俛首天祿閣君平獨西南抗顏觀寥
廓無猜到沈冥有故驚寂寞用心豈必殊拘肆事
終若

過介甫歸偶成

結交謂無嫌忠告期有補直道詎非難盡言竟多

迂知者尙復然悠悠誰可語

雜詩

三季已千載古道久荒榛紛紛東漢士飛鳴不當
辰經營救氛沴此志卒埃塵士生有進退何必棄
其身其道雖褊迫其行絕緇磷公心不吾誑復求
無此人

韓公綴文辭筆力乃天授並驅六經中獨立千載
後謂爲學可及不覺驚縮手如天有日月厥曜無
與偶當之萬象瑩所照百怪走此其自然光萬物

安得有其人雖已歿其氣著星斗窮天破大惑更
覺功業久當身止自善所遇時則不致官九列齊
此理嗟亦苟孔孟非其稱斗祿應未取惜哉天下
才甘受外物誘

令弟南源刈稻

買田南山下禾黍忽已秋糟牀待此注豈止衣食
謀窮陰迫霜霰不可遲孳收久苦城中囂至山諒
優游况已除險穢新堂至岩幽窗軒衆峯出階墀
水淙流良材未成種草樹亦已稠寒花開照耀谷

鳥樂啾啾心與珍境接佳興固已適而况饋朝夕
甘美日可接晝務誠遺滯夜工督春掄因觀稼穡
勞始覺奉養優此樂詎非幸人生復何求送子因
自起往意不可留

將之江淞延祖子山師柔會別飲散獨宿

孤亭書懷

蜀客向何處欲觀浙江潮艤舟吳門柵况爲故人
招置酒吳亭上無人吹紫簫浩觀萬物變颯爾生
涼飈遂恐時節晚芳蘭從此凋功名竟安在富貴

空寥寥

蘇軾

秋懷

苦熱念西風常恐來無時及茲遂淒凜又作徂年
悲蟋蟀鳴我牀黃葉投我幃窗前有棲鵬夜嘯如
狐狸零冷梧葉脫孤眠無安枝熠燿亦有偶高屋
飛相追定知無幾見迫此清霜期物化逝不留我
興爲嗟咨便當勤秉燭爲樂戒暮遲

海風東南來吹盡三日雨空階有餘滴似與幽人
語念我平生歡寂寞守環堵壺漿慰作勞裹飯救
寒苦今年秋應熟過從飽雞黍嗟我獨何求萬里
涉江浦居貧豈無食自不安歛歛念此坐達晨殘
燈翳復吐

高郵陳直躬處士畫雁

野雁見人時未起意先改君從何處看得此無人
態無乃稿木形人禽兩自在北風振枯葦微雲落
璀璨慘澹雲水昏晶熒沙礫碎弋人悵何慕一舉
眇江海

神女廟

大江從西來上有千仞山江山自環擁恢詭富神
姦深淵鼉鼉橫巨壑蛇龍頑旌陽斬長蛟雷雨移
蒼灣蜀守降老蹇至今帶連環縱橫若無主蕩逸
侵人寰上帝降瑤姬來處荆巫間神仙豈在猛玉
座幽且閒飄蕭駕風馭弭節朝天關倏忽遍四方
不知道里艱古妝具法服窳殿羅烟鬟百神自奔
走雜沓來趨班雲興靈怪聚雲散鬼神還茫茫夜
潭淨皎皎秋月彎還應搖玉珮來聽水潺潺

潁州初別子由

征帆挂西風別淚滴清潁留連知無益惜此須臾
景我生三度別此別尤酸冷念子似先君木訥剛
且靜寡辭真吉人介石乃機警至今天下士去莫
如子猛嗟我久病任意行無坎井有如醉且墜幸
未傷輒醒從今得閒暇默坐消日永作詩解子憂
持用日三省

過宜賓見夷中亂山
江寒晴不知遠見山
日出朦朧含高峯
晃蕩射峭

壁橫雲忽飄散翠樹紛歷歷行人挹孤光飛鳥投
遠碧蠻荒誰復愛穠秀安可適豈無避世士高隱
鍊精魄誰能從之游路有豺虎跡

送小本禪師赴法雲
寓形天宇間出處會有役澹然都無營百年何由
畢山林等憂患軒冕亦戲劇我未卽歸休歸寧便
安逸王城滿豪傑議論紛黑白師來亦何事孤月
挂空碧是身如浮雲安可限南北出岫本無心旣
雨歸亦得

贈狄崇班季子

狄生臂鷹來見客不會揖踞牀咤得雋借箸數禽
入短後掬豹裘猶濺猩血濕指呼索酒嘗快作長
鯨吸半酣論刀槊怒髮欲起立北方老獅子狂突
尙不繫要須此慄悍氣壓邊烽急夜走追鋒車生
斬活離級持歸獻天王封侯穩可拾何爲走獵師
日使羣毛泣

送千乘千能兩姪還鄉

治生不求富讀書不求官譬如飲不醉陶然有餘

歡君看龐德翁白首終泥蟠豈無子孫念顧獨遺
以安鹿門上冢回牀下拜龍鸞躬耕竟不起耆舊
節獨完念汝少多難冰雪落綺紈五子如一人奉
養真色難烹雞獨餽母自饗苜蓿盤口腹正累人
寧我食無肝西來四千里敝袍不言寒秀眉我似
兄亦復心閒寬忽然舍我去歲晚留餘酸我豈軒
冕人青雲意先闌汝歸蒔松菊環以青琅玕橙陰
三年成可以挂我冠清江入城郭小圃生微瀾相
從結茅舍曝背談金鑾

過雲龍山人張天驥

郊原雨初足風日清且好病守亦欣然肩輿白雲
道荒田咽蛩蚓村巷懸梨棗下有幽人居閉門空
雀噪西風高正麗落葉紛可掃孤僮臥斜日病馬
放秋草墟里通有無垣牆任摧倒君家本冠蓋絲
竹鬧隣保脫身聲利中道德自濯澡躬耕抱羸疾
奉養百歲老詩書膏吻頰菽水媚翁媪饑寒天隨
子杞菊自擷芼慈孝董邵南雞狗相乳抱吾生如
寄耳歸計失不早故人豈敢忘但恐迫華皓從君

學種秫斗酒時相勞

初秋寄子由

百川日夜游物我相隨去惟有宿昔心依然守故處憶在懷遠驛閉門秋暑中藜羹對書史揮汗與子同西風忽淒厲落日穿戶牖子起尋袂衣感歎執我手君顏不可恃此語君勿疑別離恐不免功名定難期當時已淒斷况此兩衰老失塗旣難追學道恨不早買田秋已議築室春當成雪堂風雨夜已作對牀聲

漢水

捨棹忽逾月沙塵困遠行襄陽逢漢水偶似蜀江清蜀江古浩蕩中有蛟與鯨漢水亦云廣欲涉安敢輕文王化南國游女儼如卿洲中浣紗子環珮鏘鏘鳴古風隨世變寒水空泠泠過之不敢慢佇立整冠纓

遊東西巖

謝公含雅量世運屬艱難况復情所鍾感慨萃中年正賴絲與竹陶寫有餘歡常恐兒輩覺坐令高

趣闌獨攜縹緲人來上東西山放懷事物外徙倚
弄雲泉一旦功業成管蔡復流言慷慨桓野王哀
歌和清彈挽鬚起流涕始知使君賢意長日月促
臥病已辛酸慟哭西州門往駕那復還空餘行樂
處古木昏蒼烟

碧落洞

槎牙亂峯合晃蕩絕壁橫遙知紫翠間古來仙釋
并陽崖射朝日高處連玉京陰谷叩白月夢中遊
化城果然石門開中有銀河傾幽龕入窈窕別戶

穿虛明泉流下珠琲乳湔交縵纓我行畏人知恐
爲仙者迎小語輒響答空山自雷驚策杖歸去來
治具煩方平

巫山

瞿塘迤邐盡巫峽崢嶸起連峯稍可怪石色變蒼
翠天工運神巧漸欲作奇偉坱圠勢方深結構意
未遂旁觀不暇瞬步步造幽邃蒼崖忽相逼絕壁
凜可悸仰觀八九頂俊爽凌浩氣晃蕩天宇高崩
騰江水沸孤超兀不讓直拔勇無畏攀緣見神宇

憩坐就石位巉巉隔江波——問廟史遙觀神女
石綽約誠有以俯首見斜鬟拖霞弄修帔人心隨
物變遠覺含深意野老笑吾旁少年常屢至去隨
猿獠上反以繩索試石笋倚孤峯突兀殊不類世
人喜神怪論說驚幼穉楚賦亦虛傳神仙安有是
次問掃壇竹云此今尚爾翠葉紛下垂婆娑綠鳳
尾風來自偃仰若爲神物使絕頂有三碑詰曲古
篆字老人那解讀偶見不能記窮探到峯背採斫
黃楊子黃楊生石上堅瘦紋如綺貪心去不顧澗

谷千尋絕山高狼虎絕深入坦無忌溟濛草樹密
葱蒨雲霞膩石竇有洪泉甘滑如流髓終朝自灌
漱冷冽清心胃浣衣挂樹梢磨斧就石鼻徘徊雲
日晚歸意念城市不到今十年衰疾筋力憊當時
伐殘木芽蘖已如臂忽聞老人說終日爲嘆喟神
仙固有之難在忘勢利貧賤爾何愛棄去如脫屣
嗟爾若無還絕粒應不死

虎丘

入門無平田石路穿細嶺陰風生澗壑古木翳潭

井湛盧誰復見秋水光耿耿鐵花秀巖壁殺氣噤
蛙黽幽幽生公堂左右立頑礦當年或未信異類
服精猛胡爲百歲後仙鬼互馳騁東軒有佳致雲
光麗千頃熙熙覽生物春意破淒冷我來屬無事
霽日相與永喜鵲翻初旦愁鳶蹲落景坐見漁樵
還新月溪上影悟彼良自怡歸田行可請

蘇轍

玉女窗

巖竇有虛明矐矐發清曉真人無儔匹窗下嚴妝

早門開秋雨入室靜長風掃絕跡杳難尋朱顏未
嘗老

題東坡遺墨卷後

少年喜爲文兄弟俱有名世人不妄言知我不如
兄篇章散人間墮地皆瓊英凜然自一家豈與餘
人爭多難晚流落歸來分死生晨光迫殘月回顧
失長庚展卷得遺草流涕濕冠纓斯文久衰弊涇
流自爲清科斗藏壁中見者空嘆驚廢典自有時
詩書付西京

張恕寺丞益齋

人生不讀書空洞一無有羨君常齋居散帙滿前
後開編試尋繹閱歲行自富縱橫畫圖出次第宮
商奏汪洋畜江河渺莽包林藪興亾數千歲絡繹
皆在口顧念今所知頗覺前日陋我家亦多書早
歲嘗竊叩晨耕挂牛角夜燭借隣牖經年謝賓客
饑坐失昏晝堆胷稍蟠屈落筆逢左右樂如聽釣
天醉劇飲醇酎自從厭蓬蓽誤逐功名誘初心一
漂蕩舊學皆榛莠失足難遽回撫卷長自詎幸君

無事年謂可終身守春耕不厭深秋穫當自受金
玉或爲災詩書豈相負

鮮于侁

新堂夜月色皎然由連理亭信步庭中徘徊
久之因爲五言一首

秋風動微涼天雨新霽後閒齋獨隱几明月在高
柳振衣步庭下顥氣入襟袖天空雲漢明隱約辨
列宿蒼蒼松檜上靈露霏欲流脫葉滿閒園繁華
迫衰朽清宵望蟾彩宜付一盃酒多病謝樽壘城

頭轉寒漏
架木浮水中
略徇通孤島
扶疎花影反
潑刺跳魚
小風月所得
多經營信云
巧隱几寂無
人朱闌萃
幽鳥

月臺

蜀地曉夜雨
輕陰多蔽天
見月月無幾
築臺邀嬋娟
高凝桂影近
俯視雲屋連
顧盼已塵外
欲挹瑤

宮仙

文同

起來

曉窗明綠紗
蜀錦壓春臥
橫腮虎魄冷
驚起新夢
破玲瓏轉條
脫縹緲梳倭
墮高軸響銀
牀時誤君
車過

新晴山月

高松漏疎月
落影如畫地
徘徊愛其下
夜久不能寐
怯風池荷卷
病雨山泉墜
誰伴予苦吟
滿林啼

系帽

秋興

晨風吹茂林夕露下芳畹秋容變憔悴復此白日
短蕭蕭歲華暮冉冉節物換浩歌倚前楹使我心
曲亂

宿田家

日落雲四起牛羊下高原今夜宿何處孤烟生遠
村寥寥岩狖響擾擾林鷓喧危坐欲終夕此意將
誰論

山園

久雨無所適新晴步山園西風滿高林敗葉驚已
翻時節急如此世事安可論夜歸燈下吟寒蟲伴
幽喧

積書巖宋詩刪第三卷目錄

五言古詩三

黃庭堅 十首

陳師道 五首

邢居實 一首

孫覺 一首

孔平仲 五首

張耒 十首

秦觀 十四首

晁補之 三首

晁沖之 二首

賀鑄 八首

劉弇 二首

楊時 二首

鄒浩 一首

任伯雨 一首

張商英 一首

喻汝礪 四首

韓駒 四首

唐庚 一首

孫覲 一首

李元膺 一首

楊甲 二首

積書巖宋詩刪卷三

錫山顧貞觀梁汾選

武陵胡獻徵存人閱

五言古詩三

黃庭堅

奉和文潛贈無咎

龜以靈故焦雉以文故翳本心如日月利欲食之
既後生玩華藻照影終沒世安得八紘置以道獵
衆智

荆公六藝學妙處端不朽諸生用其短頗復鑿戶
牖譬如學捧心初不悟已醜玉石恐俱焚公爲區
別不

次韻答斌老病起遊東園

主人心安樂花竹有和氣時從物外賞自益酒中
味斲枯蟻改穴掃籜筍迸地萬籟寂中生乃見風
雨至

同宋景瞻分題汴上行

東風何時來堤柳芳且柔河水日已銷漫漫春水

流寒梅未破華芳草綠猶稠歲月不我還念此人
生浮高車無完輪積水有覆舟鹿門不返者誰得
從之遊

古風上蘇子瞻

江梅有佳實託根桃李場桃李終不言朝露借恩
光孤芳忌皎潔冰雪空自香古來和鼎實此物升
廟廊歲月坐成晚烟雨青已黃得升桃李盤以遠
初見嘗終然不可口擲置官道傍但使本根在棄
捐異何傷

次韻子瞻送顧子敦河北

今代顧虎頭骨相自雄偉不令長天官亦合丞御
史能貧安四壁無愠可三已昨來立清班國士相
顧喜何因將使節風日按千里汲黯不居中似非
朝廷美大任錄萬事御坐留諫紙發政恐傷民天
步薄冰履蒼生憂其魚南畝多被水公行圖安集
信目勿信耳

晁張和荅秦觀五言予亦次韻

山林與心違日月使鬢換儒衣相詬病文字奉娛

玩自古非一秦六籍益多難詩書或發冢熟念令
人惋秦君銳本學驥子已血汗相期驂天衢伯樂
常一盼士爲欲心縛寸勇輒尺懦要當觀此心日
照雲霧散扶疎萬物影宇宙同璀璨置規豈惟君
亦自警弛慢

和邢惇夫秋懷

曩時高唐客暮雨朝行雲陰居懷天匹楚觀夢紛
紜我欲覩光儀齋明炷爐薰天高萬物肅誰爲帝
子魂

七均師無聲五和常主淡芸芸觀此歸一德貫真
濫夢臨秋江水魚蝦避窺瞰明月本無心誰令作
寒鑑

曉放汴舟

秋聲滿山河行李在南宋川塗事鷄鳴身亦逐羣
動霜清魚下流橘柚入包貢又持三十口去作江
南夢

寄題欽之草堂

河南有伏流經營太行根盛德不終晦發爲清濟

源公家濟源上太行正當門修竹帶藩籬百禽鳴
朝瞰仰視浮雲作俯窺流水奔相望有盤谷李愿
故居存主人國之老實惟商巖孫班行昔供奉屢
進逆耳言天子色爲動羣公聲亦吞肅肅冰霜際
不改白玉温出處士所重其微難具論公勿懷草
堂朝廷待公尊

將歸葉先寄明復季常

初日照屋山好鳥弄簷角卷簾吏却掃齋舍寒蕭
索呼兒筍春醪期與夫子酌簡書驅我出衝雪凍

兩脚算行星輝輝曉起雞喔喔青烟過空村商旅
無遠橐豈不欲少留王事苦敦薄平生白眼人今
日折腰諾可憐五斗米奪我一溪樂公等何逍遙
睥睨寄講學談犀振清風碁局落秋雹雲陰愁濛
鴻山路險犖确慎無告歸軒使我數日惡羸驂逆
歸心旋濶蹶霜灤悲嘶惜鄣泥短箠冷難捉南征
喜氣動迎面蛛絲落買網鱸金橙歸償炊黍約

陳師道

妾薄命

爲曾南豐作

主家十二樓一身當三千古來妾薄命事主不盡
年起舞爲主壽相送南陽阡忍着主衣裳爲人作
春妍有聲當徹天有淚當徹泉死者恐無知妾身
長自憐

葉落風不起山空花自紅捐世不待老惠妾無其
終一死尚可忍百歲何當窮天地豈不寬妾身自
不容死者如有知殺身以相從向來歌舞地夜雨
鳴寒蜚

還里

曠士愛吾廬遊子悲故鄉慷慨四方志老衰但悲
傷虛名自成誤失得略相當莫年還家樂未覺道
路長閭里喜我來車馬塞康莊爭前借顏色草木
亦晶光向來千人聚一老獨徜徉手開南陽阡松
栢鬱蒼蒼未願守一丘脫手萬里航平生功名念
倒海浣我腸款段引下澤無絃更空觴尚恐北山
南有文移路傍

和謝公定觀秘閣文與可枯木

斯人不復有累世或可期每於丹青裏一見如平

時壞障塵得入慘淡令人悲墨色落欲盡巖顏終
不移念此猶少作未盡冰霰姿北枝把異鵲意定
了不疑惜哉不得語胸次幾興衰一爲要貴役可
復愧畫師謝侯名家子感慨形苦詞豈惟工語畫
勁特頗似之何當補諫列一吐胸中奇

和寇十一同登寺山

度暑無好懷憑危略幽致衣冠蔚如林從我才一
二茲山昔曾登歲月誰得記尚有名勝留不與金
石悴孰知千載後我與子復至烟昏倏見燈洪發

疑無地領略章句手割據英雄志興壞容一瞬今
昔當幾喟圍山缺西北放目不可制歸懷納清境
夜榻成良寐會逢南過適不問西來意

邢居實

寄陳履常

十年客京洛衣袂多黃塵所交盡才彥惟子情相
親會合能幾日歡樂何遽央春風東北來飄我西
南翔驪駒已在門白日行且晚停觴不能飲將去
更復返把腕捋髭鬚悲啼類兒女人生非鹿豕安

得常羣聚朝別河上梁慕涉關山道匹馬逐飛蓬
離恨如春草去去日已遠行行淚橫臆昨日同袍
友今朝離鄉客來時城南陌始見梅花白回首漢
江頭黃梅已堪摘杖策登高城極目迴千里落日
下青山但見白雲起遠望豈當歸長歌涕如雨歸
心如明月幽夢過潁汝抱膝長相思故人安可見
忽枉數行書彷彿如對面紛紜輦轂下冠蓋爭馳
逐吹噓多賢豪肯復念幽獨空齋聽夜雨深竹聞
子規此情不可道此心君詎知

孫覺

介亭

真人昔未起奔鹿駭四方連延天目山兩乳百里
長有地跨江海無種生侯王中宵燎穹旻列石表
壇場朱旗大梁野英氣吞八荒寥寥百年後故物
亦已亾所餘彼巉巖峰巒屹相望主人承明老星
斗工文章築亭紫霄上坐客蒼株旁攀雲弄明月
曉星生扶桑禹山隔波濤簡書未埋藏願逢希夷
使水土還故常

孔平仲

夜坐菴前

人定鳥棲息菴前聊倚闌裴回明月上正在修篁
端清影冰玉碎疎音環佩寒翛然耳目靜覺此宇
宙寬人生甘物役汨沒紅塵間宴坐得俄頃境幽
心已閒諒能長無事自可駐未顏所以學道人類
多隱深山何不自自菴前菴前讀書讀書讀江淹集讀江淹集煌煌一疋錦爛爛五色筆始知何處得張此夢中

失淹也雖善文歲幾少筋骨譬人氣不深往往多
奄忽晚年既富貴外學仍老佛豈非有所息寢使
天才屈奈何不自尤秘怪疑鬼物我有十丈舟夙
期駕溟渤褰霞叩東皇擘浪窺月窟唯憂倦或止
視此頗自栗

九日獨登曹亭

重陽不見菊節物愈凋零性復不嗜飲對酒已如
醉秋堂靜便臥既起思殊清登高未免俗亦不造
林垆屋西連郡郭木末乃曹亭杖藜只獨往坐對

南山青蕭瑟西風高泱泱滯雨晴斷雲見天色殘
潦知地形遙峰落照斂別浦暝烟生歸鳥向村急
孤舟當渡橫此時有佳興乃惡聞人聲况今預尊
俎而使聽竽笙嗟吾趣尚僻取笑世上英豈宜濫
簪紱但可老柴荆

早行

客興謂已旦出視見落月瘦馬入荒陂霜花重如
雪海風吹萬里兩耳凍幾脫歲晏已苦寒近北尤
凜冽况當清曉行遡此原野濶笠飛帶繞頸指強

不能結農家烟火微炙手粗可熱豈能迂我留而
就苟且活仰頭視四字夜氣亦漸豁苦心待正晝
白日想不闕

出城

駐馬河之西送車皆已返郊原人漸少風物秋將
晚身如獨鳥輕意與青山遠

張耒

冬日放言

秦人焚詩書意欲遂絕滅六經至今存何曾損毫

髮興衰有天理人力自淺拙不憂驪山墓回首遭
發掘

元子本豪爽頗復有俗氣孟嘉亦可人乃與較權
勢崛強盡百年究竟成何事江左無英雄汝得免
徒隸

離黃州

扁舟發孤城揮手謝送者山回地勢卷天豁江面
瀉中流望赤壁石脚插水下昏昏烟霧嶺歷歷漁
樵舍來此實三載鄰里通假借別之豈無情老淚

爲一灑篙工起鳴鼓輕櫓健如馬聊爲過江宿寂
寂樊山夜

宿樊溪

黃州望樊山秀色如可鑒扁舟橫江來山脚繫吾
纜大川失洶湧淺水澄挹攬北風吹疎雨夜枕舟
屢撼齊安不可望滅沒孤城暗奔流略溪口龍蜃
屢窺瞰平生千金質戒懼敢忘暫茲遊定何名耿
耿有餘念

廣化遇雨

浮雲蔽高峰臺殿延晚色風聲轉谷豪雨脚射山
白東樓瞰虛明龍甲排檜栢蕭森異人境坐觀動
神魄撞鐘寺門掩晚霽尚殘滴相携下山去塵靜
馬無迹歸來解鞍歇新月如破璧但恐桃花源回
舟已青壁

霜後步西園

濃霜失暄妍短日淡無色回風振中園搖落聲策
策草根飢鳥啄飛舞時嘖嘖野荒無遺粒卒歲將
何食鮮鮮西墻下幽草弄寒碧四時不吾欺聊假

汝頃刻

神運殿望香爐天池等峰晚宿官廳明日

早發

遠公不出山坐受龍天供地祇敢愛寶木石親輪
送巖巖千年屋山立屹不動風雲宿修梁星斗近
華棟亭亭碧香爐薜蔔時自涌五雲巖擁衛天樂
下鸞鳳神池闕寶像光怪發巖洞誰能陟其顛手
攬游龍鞚東堂黃金藏龍象儼環拱蕭梁亾國輦
拙樸昔誰用掃堂爲一睡清極乃無夢思歸戒晨

發結束勤僕從鴻鐘振林莽月落朝嵐重再往墮
渺茫猿鶴應嘲諷

同楊二十緱氏寺宿草酌張正民秀才見

訪

契濶千里別惻愴難具言殷勤一宵語願子未卽
眠空堂燈火青旅褐借僧氈勞勞一杯酒不解道
路寒經年相從樂旣別亦茫然人間事盡爾聚散
亦何歎但悲多難身尚獲朋友權間關百憂中一
笑值萬錢張子年未冠已雄羣少年巉巉坐我側

紫眸秀雙顴壯志激衰懦清談破愁煎天明卽分
散奈此情悁悁

上方

足躡青玉磴躋攀不知勞回頭瞰木杪始覺所歷
高孤鳥去滅沒奔溪深怒號白日當畫梁青雲送
微颺坐久神慮平微涼清骨毛但驚塵垢容俯仰
近赤霄古壁有遺字昔人嗟寂寥南風不知暑古
木常蕭蕭

秋日晨興寄楚望

夜雨霽清曉浮雲散涼川幽人理青髮汲彼石井
泉焚香展素帙持珠諷妙言晨暉淡悠揚秋霞麗
紺天萎花開露餘孤葉零風前感此芳節晚長嘯
心悠然傾觴散滯念殮菊留華年牢落歲暮心非
君誰與宣

秦觀

田居

雞號四隣起結束赴中原戒婦預爲黍呼兒隨掩
門犁鉏帶晨景道路更笑喧宿潦濯芑屨野芳簪

髻根霽色披宵靄春空正鮮繁辛夷茂橫阜錦雉
嬌空園村落次第集隔塍致寒暄眷言月占好努
力競晨昏

入夏桑柘稠陰陰翳虛落新麥已登場餘蠶猶占
箔隆穢破曾陰鮮飈泛藁薄林深鳥更鳴水漫魚
知樂羸老厭煩歎解衣屢盤礴家婦餉初還丁男
耘有託倒筒備青錢鹽茗恐垂橐明日輸絹租鄰
兒入城郭

昔我蒔青秧廉纖屬梅雨及茲欲成穗已復頽星
暑遲暮易昏晨搖落多砧杵村迥少過從客來旋
炊黍藁祠土鼓悲野埭鷓雞舞雉子隨販夫老翁
拜巫女辛勤稼穡事惻愴田疇語得穀不敢儲催
科吏傍午

嚴冬百草枯鄰曲當休暇土井時一汲柴車久停
駕寥寥場圃空喧春起旁舍田家重農隙翁媪相
邀迂班坐醞酒醪一行三四謝飲酣更獻酬語闕
或悲咤悠悠燈火暗刺刺風飈射客散靜柴門星
蟾耿寒夜

春日雜興

結髮棄外好，僂俛希前修。繆挾江海志，耻爲升斗謀。
齟齬歷難刻，晝賤貧多釁。尤發軔背伊闕，解驂憩邗溝。
丹鉛費未晷，麩驅深愁壁。月鑒簾櫳珠，星絡梧楸泯。
泯渠水駛霏，霏花霧浮公子。悵何許撫膺，徒離憂。

潭潭故邑井，猗猗上宮蘭。不食自清潔，莫服更幽閒。
志士恥弱植，卷跡甘饑寒。佳晨追良覲，觸物縣悲端。
川途眇回遠，經歲曠音翰。豈不慕裘馬，詭得

非所安。蟬冕多怵迫，繩樞尠憂患。枉尋竟何補，方柄誠獨難。

寢瘵倦文史，駕言從遨嬉。颶風舉遙激，規日麗清漪。
含桃粲朱實，杜若懷碧滋。娉娉弱絮墮，囿囿文魴馳。
明霞廓遠矚，哀禽攬離思。縟草天際合，孤雲川上移。
寬閒絕輪鞅，重復多路岐。信美難久佇，歸歟從所治。

藝籍燔祖龍，斯文就淪喪。帝矜黔首愚，諸雋出相望。
揚馬操宏綱，韓柳激頽浪。建安妙謳吟，風槩亦

超放玉繩帶華月艷艷青冥上奕世希未光經緯
得無妄兒曹獨何事詆斥幾覆醬原心良自誣猥
欲私所尚螳螂拒飛轍精衛填溟漲咄咄徒爾爲
滄海固無恙鷓鴣日凋滅黃口紛冗長投袂睇層
霄茲懷誰與亮

海康書事

白髮坐鉤黨南遷瀕海州灌園以餬口身自雜蒼
頭籬落秋暑中碧花蔓牽牛誰知把鉏人舊日東
陵侯

荔子無幾何黃柑遽如許遷臣不惜日恣意移寒
暑層巢俯雲水信美非吾土草芳自有時鴨鵝何
關汝

和孫莘老題召伯斗野亭

淮海破冬仲雪霜滋不平芰荷枯折盡積水寒更
清輟棹得佳觀湖天繞朱甍信美無與共濁醪聊
自傾北眺桑梓國悠然白雲生南望古邗溝滄波
帶蕪城村墟翳茅竹孤烟起晨烹簷間鳥聲落客
子念當行攬衣視日影薄陰漏微明何時復來遊

春風發鮮榮

送李端叔從辟中山

人畏朔風聲我聞獨寬懷豈不知凜冽爲自中山
來端叔天下士淹留蹇無成去從中山辟良亦慰
平生與君英妙時俠氣上參天孰云行半百身世
各茫然當時兒戲念今日已灰死著書如結菴聊
以忘憂耳駸駸歲道盡淮海歸無期功名良獨難
雖成定奚爲念君遠行役中夜憂反側攬衣起成
章贈以當馬策

同子瞻端午日遊諸寺賦得深字

太史抱孤韻暢懷在登臨別乘慙鄒枚佳辰事幽
尋參差水石瘦窅窕房櫳深清磬發疎箔妙香橫
素襟復登宰堵波環回矚崎嶇雙溪貫城郭暝色
帶孤禽涼飈動爽籟薄雨生微陰塵想澹清漣牢
愁洗芳斟揮筴訂往古援毫示來今悔無刻燭敏
續此金玉音

茶

茶寔嘉木英其香乃天育芳不愧杜蘅清堪揜椒

菊上客集堂宇圓月探奩盃玉鼎注漫流金碾響
杖竹侵尋發美鬯旖旎生乳粟經時不銷歇衣袂
帶紛郁幸蒙巾笥藏苦厭龍蘭續願君斥異類使
我全芬馥

晁補之

荳葉黃

蒹葭蒼荳葉黃南村不見岡北村十頃疆東家車
滿箱西家未上場荳葉黃野離離鼠窟之兔入哇
豕母從豚兒豕啼豚咿咿銜角復銜萁荳葉黃穀

又熟翁媪衰舖糜粥荳葉黃葉黃不獨荳白黍堪
作酒瓠大棗紅皺荳葉黃穰穰何膻膻腰鎌獨健
婦大男往何許官家教弓刀要汝殺賊去

御街行

雙闕齊紫清馳道直如綫煌煌塵內客相逢不相
見上有高槐枝下有清漣漪朱闌夾兩邊貴者中
道馳借問煌煌子中道誰行此且復就下論驄馬
知雜事官卑有常度那得行同路相效良獨難且
復東西去

再次韻文潛病起

淮浦見之子春風初策名頗訝謫仙人有籍白玉
京晚遇廣文直老交心愈傾同升芸香府偶坐華
髮生斯人自龍性意變難章程嗜酒不疵吝身如
秋葉輕自言士處世何必冰雪清交遊滿臺省毀
譽半王城不肯效俯仰畏高侮鰥惇常思老伊潁
紫蟹羞吳秔我輒抵掌和音同磬隨笙小人奉慈
母皆嘗小人羹寒衣婦補綻學績女娉婷日欲江
海去心期楊柳青衆木構大厦豫章倚孤撐如子

足醫國可容移疾行丹書紫皇誥玉篆五岳形何
必陶隱居吞霞養純精訪道自素約諸心期暮齡
但恐牽俗緣志大功不成息交屏妻子此語不須
驚

晁冲之

次韻集津兄會羣從王敦素宿王立之園

明日西征馬上寄示諸人

秋高訪幽居風急桑未落天寒鷄犬靜地僻門巷
索主人避世賢自說久棲泊呼兒出罇罍梨栗亦

不惡賓客四五人談笑動林薄夜闌慘無懽離憂
忽然作伯也天下士千金重一諾揮斥楊墨徒正
是鄒魯學如何但銀魚生事了無託惜哉桃李姿
見笑葵與藿鷄鳴驅車行令人意參錯

擬一上人懷山之什

中夜雪打窓燈暗火照屋袖手地爐火餅聲起絲
竹憶我故山房松風韻崖谷山空牛斗寒寺靜魚
鼓肅西砦鹿不歸東嶺鶴留宿更想醉翁亭兩峰
高並玉

賀鑄

閒情

紫苔生玉甃青窓隱夕曛佳人久不見翠被銷檀
痕長巾拂綠綺上有三年塵聊彈別燕弄寄謝陽
臺雲

擬阮步兵夜中不能寐

夜久不成夢張燈開故書清霜屏雲物片月來庭
除良時悵難再不與佳人俱掩卷長太息望子城
之隅

遊雍丘燕溪分韻作

捨轡步平陸解衿俯清池微風度修竹瑟瑟生淪
漪梨華照晴影暖雪正紛披把酒久沈想況與玉
人期

宿寶泉山慧日寺

日入思不遑驅車更之東回蹊出蒙密解袂迎長
風風從何許來歷歷江南鐘頓轡阿蘭若虛庭月
正中流螢逗深竹白鳥巢青松華燈耿翠箔瑤花
擢春叢絕境美清夜况非塵界逢惜無一樽酒幸

與之子同明發卽南北浮生兩飛蓬

冠氏送武欽之安陽

黃金絡征轡之子待明發尊酒少遲留禪林見涼
月歌鬟結蛾黛怨此佳期濶去去柳堤風青蟬催
白髮

遊雲龍張氏山居

雲龍山距彭城郭南三里郡人張天驥聖塗築
亭于西麓元豐初郡守眉山蘇公屢登燕于此
亭下畜二鶴因以放鶴名亭復爲之記亭下有

小屋曰蘇齋壁間榜眉山所留二詩及畫大枯
株亦公醉筆也壬戌秋余初至徐張惠然見臨
繼相招爲山中遊

昔聞張逸民卜築雲龍山東望結遐想喜得彭城
官一語定襟契宛如平生歡招携屬休沐投此蘿
薜間女僕候門巷青鞋雙翠鬟蘇齋軒戶明餅火
焚椒蘭寶墨鬼神護清詩冰玉寒森然拱簷雷架
石排琅玕東趨放鶴亭磴道披茅菅指顧百村落
炊烟林莽間日脚灑平陸兩川如斷環淒風振脫

葉坐怯衣裘單引領紫霄極飄飄如可干緬懷眉
山公五馬來遊盤酣興走顛筆蒼崖卽鑿刊午年
仲冬月雪野雲瀰漫掃石坐舒嘯惠泉烹鳳團當
時詫盛集千古陋達安俛仰迹遂陳斯人久泥蟠
我來後千日逸躡何由攀仰懷勝事往俯遵塵路
還山英能不辱時欸白雲關

和張謀父遊石佛山觀魏太武書

按南北史彭城圖經魏太平真君十一年太武
南侵至瓜步築宮駐蹕聲言欲渡江宋人患之

遣使請婚饋百牢以犒師明年春旋師渡淮復
留連徐方再旬始北去今彭城南五里因山鑿
佛高十許丈東北百步有大磐石欹枕小溪偉
然四字曰阿彌陀佛皆徑尺餘蓋當時太武以
鐵筆劃是字非刊刻也乙丑秋張謀父賦詩要
余屬和焉

中區昔屯否代邦天所開鴻圖屬太武不世英雄
才南洗洛陽血西盪長安灰羶車十萬乘略地驅
風雷一葦濟長淮築宮瓜步隈東鄰拜牢餼走使

爲婚媒雲旗卽歸路覽勝此徘徊俯揮鐵馬鞭頑
石同陶坏劃成四大字屹栗陰虹摧淪精入崖壑
怒氣羞蟠回茫茫六百年風雨生莓苔偉蹟寔銷
泯威靈安在哉君爲訪古遊賦詩追七哀人生誰
不爾零落同塵埃

登金陵雨花臺

迢迢朱雀航飛蓋共凌越東風石子岡芳草微徑
絕生公法堂在清夜貯明月回認城郭遊春華爛
晴雪長煙動江隩微雲起山脅連檣去遲回白鳥

屢明滅

劉弇

感遇

嫵媚誰家子粲粲生輝光
弄姿俯春蘭臨風振微
芳秋水揚清矚白玉雙明璫
問渠家何許笑指南
山陽去去不輟軌
恍若遊雲翔遙看入縹緲
明月斷人腸

疾雷疑車音出門乃知非
抱影長自明流螢點霜
幃羅帶剪秋水黃金縷
春衣持看清夜闌
愁非故遲遲歸

楊時

哀鴻

哀鴻嘗苦飢悲鳴垂其翼
朔漠曉霜寒江湖晚烟
幕乾坤一網罟高飛亦何益
日暮無與羣驚風暗
沙磧

送鄭季常赴太學正

驅車出西城眷言與子違
北顧臨康衢問子將何

之赤驥度渥洼終當飲瑤池成都九軌道一躍不
可追浮塵暗荆棘捷徑行多迷長風戰秋林零露
沾人衣青松不改柯期子清霜時

鄒浩

次韻韓君表雪中感懷

龍袞不解顏憂民向來急天高委真符年豐兆原
隰連山水氣昏過雲雁聲澀先春凌馬奔投隙作
塵入瀕竹乍蕭蕭驚風還汲汲頗輕花鬪狂宜共
雨爭濕夜半回曉光木杪森鵠立開編適吾心鼓

柅輟清集一飽倘可償萬事非所及想見秋稼前
腰鎌荷青笠

任伯雨

述懷

天符庚辰歲孟冬十二日任子丞大宗碌碌奉朝
籍聖主訪落初聽言勞日昃諫路員有闕求人恐
不及誰謂方遴選邂逅首疎迯詔旨忽中授聞命
旦夕惕平生慕古人素願或可畢精神倍疏瀹激
昂登文石青雲開九天清光親咫尺每見情益交

肝膽盡剖析敬承丁寧訓重許以忠直自喜千載
遇奮身違他恤志欲收主威力先排巨室切齒憤
欽永刻意望夔稷哀哉愛君心不能當衆嫉投湘
爲獨醒得罪因懷璧尚賴天德廣閱歲已再謫仇
人意未厭窮荒必投斥轉海徑萬里艱危備經歷
有時遭颶風天地如沫漆雪浪山崩頽轟厖飛霹
靂扁舟甚桔槔俯仰顛倒立雙檣捲欲折繩斷水
蘸蓆鯨鱷口垂涎噴吐烟雨集萬怪競周章腥臊
助噓吸平生仗忠信安敢保瞬息黃緣脫魚腹島

嶼稍登陟天氣鬱欲流土色焦成赤草木蒸氛霧
亭午日未出荒徑少人行窸窣走虺蜴居民傍溪
澣橫崖戶百十矮屋盡柵欄臭穢如圈櫪家家啖
菜粥雜米無十一小魚與細鰕相尚珍鼎食鳥言
分嘲哂卉服全蒙羃顏色盡黃腫大半抱瘴疾其
風濫以污其俗拙以僻殆非人間世宜爾太荒閩
我生本匹夫賦性自真率雅有江海志仕宦特牽
迫一日偶遭際用舍何敢必但思忠邪分於國繫
休戚滄溟有竭時我意何窮極

張商英

香林院

瑟瑟松上風冥冥竹間露窗虛草色寒石仄蒼苔
古長廊寂無人殿閣下鈴語此意兩蕭然彷徨不
不能去

喻汝礪

遊琴臺

臯朔語顛俳上頗倡優之嚴吾數預事慘慄失所
棲眷言彼妹子深情結幽期浩露泛酒甕輕雲思

琴徽撫絃視八荒頗覺秦岫低紛紛漢諸子悟解
良獨遲一朝不自保灑血霑裳衣公豈不炯戒慮
禍益已微汚已迴前識達生邁天倪濶哉昭曠情
豈屑後代嗤

遊巖真觀支機石壁有記古鼎丹茅尚存

古木共幽意長廊亦宴如於焉詠逍遙且復散衣
裾塵慮颯已空道心頗閑舒不知度世人去此歲
幾徂云何有丹砂尚爾留庭隅支機亦悠哉誰復
訂有無我知此公意慨彼元封初繼之五鳳間斯

民斃刀鋸聊欲謝世網歛以道爲娛抱獨理自會
曠懷遺所拘初匪逃世人而世自我疎含默念斯
人起我憂患餘

晚泛浣花遂宿草堂

扣橈泛澄虛濯流睇幽芳晚霏綴奇樹夕霏媚疎
篁歸鳥亦暫閒夜魄動初涼忽焉衆星微天高月
舒光昔也杜陵子悠然此茅堂客至酒自斟句得
意已忘云何當忍饑零落在道旁古來技入神一
飯豈可望吾輩天所窮高歌淚沾裳

遊海雲寺

渺渺天宇初便復有此山清辰及茲遊遐想百代
前來者幾何人當時各爲歡淑質揚妙舞哀絲遞
清彈樂事坐如昨芳歲已屢殫向來偕遊人落葉
不復還念誰當久存而不住所緣破涕聊一怡山
川却萋妍未知後世事誰復當來旋

韓駒

題采菊圖

黃菊有何好且寄平生懷遇酒興不淺無酒意亦

佳此理誰復明自昔寡所諧空餘采菊圖寂寞縣
高齋

今日菊始華叢雁鳴相和若無一觴酒如此重九
何悠然數酌盡會心豈在多醒來不復記散髮東
山阿

淮上書事

平楚盡積水長淮多奇峰蕭條月照夜浩蕩風鳴
冬客行未可歸弊裘那得重寒氣搜病骨清潭貌
衰容遠游有滯念將老無歡悰故園渺萬里去此

嗟誰從

題中寂堂

虎臥文公廬鳥窠道林室本自無俗喧何由辨真
寂逃溺必登山避燔必趨澤君看好靜人萬慮固
未息是心倘已剗對境起亦得上人早聞道晚順
世間迹振衣下靈岩飛錫來上國高堂亦何有萬
卷繞四壁客來倚風廊晤語終日夕漫言門如市
中有忘機客吾曹詩酒污此道誰目擊唯應寂時
趣獨有青士識

唐庚

北歸至廣州寄惠州故人

歸心如躍馬奮迅不可駐別情如放猿已去猶返
顧三年孺子社數借柱史書好在五噫孫善保千
金軀舊來談天口老去盡地力萬里不相忘寄聲
問眠食

孫覲

靜老通幽軒

諸峰倚崔嵬衆壑隱犇峭寓目欣有擊會心領其

要開廬結茅竹伐翳斬蓬藿此君亦可人玉立盡
娟妙風酣翠相倚月吐清自照窈眇非世音鸞鵠
終夜嘯烟塵暗北關烽火被南徼便欲老三閭終
焉隱屠釣

李元膺

折楊柳

東風來何時百花已飄零獨有堤上柳慘淡含春
榮扁舟復何適延客江上亭顧無青玉案何以送
子行攀條欲相贈上有雙流鶯流鶯正求友奈此

離別情

楊

謁朱真人祠

一濯巖下溪再拜巖中庭清風肅然來吹我衣上
腥仙人芙蓉冠乘月下雲輶山空雜佩響靜夜朝
百靈寂寥古壇外但見斗與星青山無行迹霧雨
空冥冥

與客遊滄浪亭得一字

霧圍林蒼黃漲落水寒碧西郊好風景曉霽千里

色相從二三子掃灑溪上石主人信愛客沽酒炊
玉粒揮觴一再行弄此竹間日跳波醉中舞野唱
寒外急牛羊歸匆匆鳧雁來一一頽然寄天放不
受世褊迫永懷堂中翁回首千歲跡豈無獨往願
乃爲飢凍逼霜空洞庭野天濶雲夢澤欲舉扶桑
枝尚掛滄海席何當從茲去旦暮生羽翼

積書巖宋詩刪第四卷目錄

五言古詩四

李綱 六首

宗澤 一首

程俱 三首

汪藻 八首

葉夢得 四首

陳與義 十三首

滕茂實 一首

沈與求 二首

李彌遜 二首

劉子翬 十三首

朱松 七首

王庭珪 二首

張九成 四首

陳淵 一首

陳深 一首

范浚 一首

洪适 一首

吳儆 三首

周必大 一首

范成大 十二首

積書巖宋詩刪卷四

錫山顧貞觀梁汾選

武陵胡獻徵存人閱

五言古詩四

李綱

渡浙江

理權適桐江隨潮過漁浦山寒雪猶積江迴月初吐空濛老龍吟鬚鬣翠蛟舞獨坐不成眠霜晴聽津鼓

覺渡寺

夕發富春渚朝次桐君廬桐君採藥地今作僧家
居石磴上窈窕林苒下扶疎山根二江合清波見
遊魚霜晴響鐘磬日落歸樵漁客從何方來弭櫂
聊脚蹑清景難久駐悵然還問途

宿都嶠山靈景寺

清晨遊栖真薄暮宿靈景山空松桂香雲細泉石
冷高崖敞飛簷象緯逼參井惜無娟娟月散此林
下影夜闌風露寒岩曲燈火耿疎鐘響嵌竇客枕

發深省

寓瓊山遠華館一夕夢遊山間小堂松竹
環合有道士坐堂上誦李太白送人遊
桃源序中有良田名池竹果森然三十
六洞別爲一天之語覺而異之今假道
容惠當遊勾漏都嶠白石羅浮皆洞天
也豈神者先告將有所遇耶賦詩以紀
之

神清遂仙遊境寂恣遐躅羽人入我夢軒戶靄松

竹高吟謫仙文逸韻響金玉覺來殘燈熒恂恍猶
在目歸途歷容惠問津非素卜將遊四洞天就彼
白雲宿豈無葛稚川妙論資灌沃試求龍虎丹一
使髣毛緣斯言儻可信長揖謝浮俗

建炎行

巨寇初犯闕太歲在丙午殊恩擢樞廷愧乏涓埃
補兩河未奠枕杖鉞出宣撫乞身緣謫讒竄謫旅
湘澗明年丁未夏被命尹天府頓聞環京畿四面
盡豺虎金湯雖可恃憂在人不可禦見危思致命入

援秉義旅旌麾亘江湄畏景觸隆暑忽傳元帥檄
果有城破語鑿與幸龍沙妃后辭禁籞皇孫與帝
子取索及稚乳禮文包旂裳樂器載篋虞金繒罄
公私技巧剝機杼空餘宗廟存無復薦簋簠凄凉
蒼龍闕寂寞玉華廡疇能供御粟誰與獻肥瘠無
從執羈勒安得生翅羽號慟絕復蘇灑淚翻作雨
繼聞宣赦書寶位登九五神明有依歸率土盡呼
舞皆言湯武姿勇智天所與向來使賊營氣誓大
當戶建牙出危城帝命纘鴻緒不然艱難中何以

脫黻綸茲讐不戴天兄弟及父母嘗膽思報吳枕
薦懲在莒齊侯何足稱句踐不須數姬炎獲再興
真人定神武願言覲行在玉色親鞞黼丹誠遂披
陳祕策得宣吐謀身計雖拙許國心獨苦片言儻
有合丐骨歸壠畝飛帆過金陵鼓柁適淮浦遙傳
告大廷命相比申甫願茲斗筭器何以動堯禹深
惟特達知感慨激肺腑如何日月光可以螢燭助
舍舟行汴堤驅車赴延佇傷心兵火餘民物亦凋
瘦中使乘驛來茶藥寵賜予拜恩丘山重坐使瘞

癘愈行行近南都戈甲震金鼓將佐迎路徬往往
多舊部冠蓋如雲屯賜宴金粟圃謝免徑造朝淚
落濕殿礎初稱宗社危天地同憤怒次陳國多難
實啓宣光主末言樗散材初不堪梁柱鼎顛將覆
餽榱折必傾宇况茲扶顛危正賴肱與股大舜舉
皋陶小白相仲父耕莘與釣渭端不乏伊呂惟當
博詢訪考慎作心膂封章屢懇辭帝曰莫如女往
作礪與舟不復容偃僂叩額宸扆前臣敢論僞楚
易姓建大號厥罪在礎斧奈何坐廟堂乃與臣等

伍更效老獵師十事聽裁處天子亮精誠一一皆可許因陳禦氛策用此敢予侮河外須救援屏蔽資捍拒問誰可驅策因薦亮與所京師當一到九廟陳鼎俎却爲巡幸計不可去中寓南陽光武興形勢亦險阻西通關陝區東與江淮距三巴及嶺海寶貨可運取據要爭權衡黠狡謀必沮募兵益貔貅買馬增牧圉號令新幟旗仗械飭干櫓軍容久不振整頓就規矩潢池盜弄兵羣惡相嘯聚偏師命剪除快若猫捕鼠餘寇悉欵降分隸歸籍簿

蒐哀將帥材賞罰頗有序經營年歲間庶可事大舉蕩氛還兩宮雪恥示千古却隆太平基不愧宗與祖豈知肘腋間乃有椒蘭妬含沙初射影聚毒陰中蠱規模欲破碎謀議漸齟齬固知鯁峭姿自不敵媚嫵恨無回天力剔此木中蠹安能破銅山但志然郤塢時危敢尸祿抗疏願引去涕泗對冕旒非不戀軒宇君臣以義合無使赭舂杵帝度不可留乃聽上印組扁舟返東吳却理梁谿艣多言更萋菲貝錦成罪罟尚荷皇天慈薄譴居鄂渚我

來雪霏霏及此歲將暮崎嶇山谷間避寇如避弩
行盡江南山始踏湖北土風烟愁浩蕩鴻雁析儔
侶沈吟白雲飛悵望黃鶴翥晴川俯漢陽葭莢滿
鸚鵡家山渺安在幽夢到別墅三年再謫官繚絡
萬里路浮游幻境中塵跡歎仰俯翠華尚蒙塵吾
敢避憂癘但嗟機會失事勢契先覩今年敵益橫
春夏蹂京輔萬騎掠秦關餘毒被陳汝五陵氣蔥
蔥中原鬱膻膻棄置不復論彌望皆莽鹵旌旆滿
江淮寇抄連齊魯六飛竟何從秋晚尚江滸何時

包干戈禮瑞奠璜琥斯民安田疇餘穀棲廩庾四
方道路通舟車走商賈吁嗟呼蒼天乃爾艱國步
譬猶大厦傾著力事撐拄居然聽頽覆此身何所
措又如抱羸瘵邪氣久已痼不能親藥石乃復甘
糗黍膏肓骨髓間性命若絲縷安得和緩徒舉手
爲摩拊馴致海宇康蒼生有環堵

哭宗留守汝霖

時危念人傑濟物須材雄尋常齷齪姿詎可收奇
功英英宗夫子邈與古人同抱器實磊落秉心鬱

精忠影纓仕州縣山立不妄從青松雖未高已足
凌蒿蓬涉世多齟齬失官久龍鍾擢居河朔郡烟
塵正昏蒙今上在藩邸奉使邊庭中力爭不可往
高牙建元戎王室遂再造廊廟當醜庸同朝共排
媚一麾江漢東見我論世故慨慷淚霑胸薦之守
留鑰付以節制隆惠政拊疲瘵威聲懾奸兇金湯
治城塹櫓樓歛以崇出師京洛間屢挫黠鼠鋒邦
畿千里寧誇說百歲翁抗疏請還闕北伐歸兩宮
辭直志鯁亮天子爲動容奸諛更切齒恨未能關

弓乃因歸鄴人感憤頌厥躬皇天不憖遺吾道何
其窮驂騮竟委頓冀北羣遂空梁摧大厦傾誰與
扶穹窿安能百身贖坐爲四海恫人亾國殄瘁天
意真懵懵中原氣蕭瑟灑滄臨西風

宗 澤

前發憤行

卿士辱多壘天王憤蒙塵禦戎要統將謀國須雋
臣百戰取封侯未必亾其身懷姦廢忠義胡顏以
爲人吁嗟世道衰大僂加縉紳平居事奔競梁汴

紛雲屯一旦國步艱四迸如星繁輔相已擇棲守
令仍踰藩冠蓋陸西竄舳艫水南奔鄙夫用慨然
策馬趨修門勤王羞尺柄悟主期片言時來倘雲
龍峩冠拜臨軒逶迤上玉除造膝陳元元措世於
泰寧歸來守丘樊

程俱

雜興

誤點成駁牛妙技有餘賞作意画蛇足至今猶撫
掌君看人間事類此或往往浩歎可奈何悠然起

遐想

春鳩一何拙社燕一何巧天陰逐其婦飲啄惟自
了銜泥亦綢繆託此華廈好物生固有分巧拙均
一飽

借居毗陵東門

客去不能寐翛然清夜闌樓居俯長川仰視天宇
寬長川濯雲漢錯落星宿寒青燈故可親且還對
塵編其人骨已朽千載與我言掩卷三太息虛簷
清露溥

汪藻

古鏡行

我有辟邪鏡得之咸陽宮其陰爲天池一母將九
龍旁書負圖字土蝕如旋蟲緘以駭雞珍妙極僅
之工請言照遠近千里秋毫空豈不鑒脂澤所貴
肝膽通問誰爲此器太古非人功客聞重歎息意
欲窺靈蹤高臺不辭倚恐客難稱容繩窮匣半啓
四室來悲風日車當晝留羞澁如頑銅森然髮上
指凜若臨霜鋒我還撫客手此豈世寶同揮淚兩

無言掩鏡鞶囊中

避地山亭野步

今日幸無雨天空出遙岑行行不知疲遂至春江
潄汲路轉籬落人家在桑陰平疇漲清波隴麥如
人深溝畎戲鳧鶩新蒲映浮沈我生本樵漁對此
諧初心景物豈不好悲來自難任風塵暗中原四
海如驚禽黃屋狩萬里兩宮隔辰參龍移螻螳窺
月晦蟾蜍侵宇宙有傾覆茲遊豈嘔噉銷憂賴濁
醪太息誰能斟

屏居零陵以門揜候蟲秋爲韻

幽人獨夜時潮落西川根渡口櫓聲急一江烟雨
昏城頭短長更不寐聽譙門趺坐數千息焚香待
朝暾

暑退潦亦收瀟湘淨如染時觀自跳魚衝破青琬
琰纖纖初弦月不受薄雲揜近村應漸寒已有鴉
數點

人生幾聰明日夜隙駒驟纔經花信風又過麥秋
候吾非金石堅與世相邂逅胡爲聞鐘鳴更歷路

傍埃

家山在何許渺渺彭蠡東人來數月程衣敝補道
中昨宵青燈花似墜釵頭蟲兒飢女沉綿歲晚書
未通

人言間濶者一日如三秋孤臣昔放逐七見寒暑
周早汚高門地姓名記前旒如何天雞星不照湘
南州

同張昌時宿高明寺

幽臥不知覺窗懸寒日初矧伊夜來雨溪聲到吾

廬故人挽我出忽枉天際書躋險敢自休青山轉
籃輿相逢竹間寺共擷園中蔬殘僧誰在亾奄忽
十載餘茗果話疇昔新晴報鐘魚東雷亦已鳴百
草茗穎舒奈何與之子齒髮日夜疎眷此不能發
牽衣更踟躕明朝各回首世事將焉如

葉夢得

送模歸卞山示弁僧宗義爲余守西巖者
自我離山間忽已兩改月飢人不忘食未坐先已
說家僮挾書至驚起慰愁絕推尋到鷄犬問訊窮

曲折此生豈多爲一壑萬慮滅可能復大錯更鑄

八州鐵

江東領
八州

汝歸馬蹄輕初不恨觸熱殷勤報

松竹吾豈成久別

端居探幽竒自謂略已徧昨登西山嶺雄絕昔未
見溪湖莽吞吐雲物紛百變乃知十年閒尚或遺
勝踐巢成輒棄去我豈秋社燕爲我課僮僕開闢
盡三面莫言羊腸險徑小煩屢轉杖藜不用扶吾
脚猶爾健

雨後與模論中原旦起模與徐敦宗遊清

涼覽觀形勢嘉其有志因以勉之
千年石頭城突兀真虎踞蒼茫劫火餘尚復留故
處大江轉洪濤騰踏不可御空城寂寞潮日暮獨
東去登臨欲弔古俯視極千慮吾兒勇過我蓐食
穿沮洳謂言撫中原未暇論割據功名亦何人我
老聊自恕他年報國心或可借前箸

懷西山

西山千畝強高下略不齊嵌空抱奇秀上有凌雲
梯架屋八九間茅簷敢辭低所欲面勢好老稚通
扶攜密竹轉修逕老松故成蹊仲冬景氣肅碧草
猶萋萋仰視天宇大四觀渺回溪徐行信足力未
畏成顛躋用意各有適孰云無町畦平生幾濡首
末路乃噬臍不作巢幕燕肯從觸籬羝胡爲濫麾
鉞坐聽鳴鼓輦外物委蟲臂全生思馬蹄可能三
徑草歸路老更迷

陳與義

美哉亭

西出成臯關上谷僅容馳天挂一匹練雙崖闢

峩忽然五丈闕亭構如危窠青山麗中原白日照
大河下視萬里川草木何其多臨高一吐氣却奈
雄風何

寄題兗州孫大夫絕塵亭

境空納浩蕩日暮生沈寥竹聲池邊起欲斷還蕭
蕭丈人方微吟萬象各動搖林間光景異月出東
山椒門前誰剝啄已逝不須邀

入閩僧房遇雨

脫履坐明窗偶至情更適池上風忽來斜雨滿高

壁深松含歲暮幽鳥立晝寂世故方未闌焚香破
今夕

十七夜詠月

月輪隱東峰奇彩在南嶺北崖草木多蒼茫映光
景玉盤忽微露銀浪瀉千頃巖谷散陸離萬象雜
形影不辭三更露冒此白髮頂老筇無前遊危處
有新警澗光如翻鶴異態發遙境回首房州城山
中夜何永

同信道晚登古原

幽懷忽牢落起望登古原微吹度修竹半林白翻
翻日暮紛物態山空銷客魂惜無一尊酒與子醉
中言

今夕

今夕定何夕對此山蒼然偷生經五載幽意獨已
堅微陰拱衆木靜夜聞孤泉唯應寂寞事可以送
餘年

舟抵華容縣

篙舟入華容白水繞城堞夾津列茂樹倒影青相

接遠色分村塢微涼動蘆葉天地困腐儒江湖託
孤檝

夜賦

泊舟華容縣湖水終夜明凄然不能寐左右菰蒲
聲窮途事多違勝處心亦驚三更螢火鬧萬里天
河橫阿瞞狼狽地山澤空崢嶸強弱與興衰古今
莽難平腐儒憂平世况復值甲兵終然無寸策白
髮滿頭生

晚晴

幽臥不知晴
檣梢見斜日
披衣起四望
天際山爭出
光輝渚蒲淨
意氣沙鷗逸
避盜半九圍
兩腳不遺力
川谷各異態
艱險常一律
胡爲作弧矢
前聖意莫詰
豈知百代後
反使奸宄密
腐儒徒歎嗟
救弊知無術
人生如歸雲
空行雜徐疾
薄暮俱到山
各不見踪跡
念此百年內
可復受憂戚
林木方翳然
放懷陶茲夕

開壁置窗命曰遠軒

我昨在衡山
傷心衢路側
豈知得此地
一坐數千

息易安生痛
定過美出飢
迫誓言如齊
侯常戒在莒
厄要將萬里
身獨面九年
壁如何不久
耐開窗玩霏
碧招呼面前
山浮翠落衾
席一笑等兒
戲都忘雪侵
幘人生何不
娛今夕定何
夕向來萬頃
胸餘地吞七
澤念此亦細
事未遽取生
壁聊使山中
人永記山下
客

寒食

行過寒食節
微雨澹春意
喧譁少所便
寂寞今有味
空山花動搖
亂石水經緯
倚杖忽已晚
人生本

何異
故園非無路今已不念歸秋入漢水白葉脫行人
悲東西與南北欲往還覺非勿云去年事兵火偶
脫遺可憐吟髯影殘歲聊相依天涯一尊酒細酌
君勿辭持觴望江山路永身已衰百感醉中起清
淚爲君揮

均陽舟中夜賦

遊子不能寐船頭語輕波開窗望兩津烟樹何其

多晴江涵萬象夜半光蕩摩客愁彌世路秋氣入
天河汝洛塵未銷幾人不負戈長吟宇宙內激烈
悲蹉跎

滕茂實

臨終詩

某奉使亾狀不復反父母之邦猶當請從主行
以全臣節或怒而與之死幸以所仗節旛裹其
尸及所篆字九爲刊之石埋於臺山寺下不必
封樹蓋昔年大病夢遊清涼境界覺而失病所

在恐於此有緣如死窮微則乞骸骨歸悉如前
禱預作哀詞幾於不達方之淵明則不可亦庶
幾少游之遺風也

虀鹽老書生謬列王都官索米了無補從事敢辭
難殊鄰復盟好仗節來榆關城守久不下川塗望
漫漫儉輩果不惜一往何當還牧羊困蘇武假道
拘張騫流離念窘束坐閤四序遷同來悉言歸我
獨留塞垣形影自相弔國破家亦殘呼天竟不聞
痛甚傷肺肝相逢老兄弟悼歎安得宣波瀾卷大

厦一木難求安就不違我心渠不汗我顏昔燕破
齊王羣臣望風奔王蠋獨守節燕人有甘言經首
自絕脰感慨今昔傳未嘗食齊祿徒以世爲民况
我祿數世一死何足論遠或死江海近或死朝昏
斂我不須衣裹尸以黃旛題作宋臣墓篆字當深
刊我室年尚少兒女皆童顏四海無置錐飄流倍
悲酸誰爲給衣食使不厄飢寒歲時一酌我猶足
慰我魂我魂亦悠悠異鄉寄沈寃他時風雨夜草
木號空山

沈與求

夜坐感事

沈沈夜氣歸虛堂
閉深寂孤燈爇餘花
寒梧韻殘滴醞釀萬斛愁
感慨一人敵何當棄短檠
陰山叱鳴鏑

夜書山驛

天寒夜向闌
月出山更靜
風露搖青空
萬象光耿耿
啼螿泣幽草
賓鴻度前嶺
歸來坐孤窗
松竹舞清影

李彌遜

群玉峰

五城十二樓
高下聳寒玉
天空開翠微
不受塵土觸
半生嗟環轅
萬事驚轉轂
寄語山中人
爲占一峰綠

宿揚州城外

舟行遶城郭
缺月疎林杪
窈窕一溪深
微茫衆星小
忘言對詩書
適意親魚鳥
幸此絕紛華
行歌閱昏曉

劉子翬

防江行

漢家飛將雄夜戰蕪城北雙刀斫盡利月暗穿圍
出低頭拔胡箭却向胡軍射

建康六感

龍翔大耳兒虎視捉刀人風雲競追逐逸軌誰能
遵大帝負英材沈潛歛求伸一呼定南國再戰威
強鄰抗魏旣搖岳攘劉亦披鱗組練繞平隰朦朧
蔽通津偉哉人物盛成功豈無因代祀已飄忽風

流久彌新停橈眺迴陸掣蔓登層闈臥龍昔來遊

萬古懷清塵

右吳

堯宮不剪茨禹室無崇壤巍巍天步降萬代猶可
仰荒哉二三君經營務華敞落梯滿清江飛斤殷
遙響疏淵引瀾澳築圃遷林莽筋力斃民軀貲財
傾國帑雄心猶未倦矯首生遐想時徂陵谷變無
事猶悲曩殷憂易中興逸樂難終享過客問青樓
荒畦棘花長

右齊

悲風嘯荒垣歌斷庭花曲壁月夜沈輝瓊樹春銷

馥郊圻遊從盛想像猶經目麗景明新妝清波映
鮮服承恩屬令姿被選皆華族朝從結綺遊暮向
臨春宿意高時忽謝步遠塗方促榮華景不長哀
樂情難足悠悠六朝事轉盼風驚燭永懷興亾端
斯文慚麗縵

右陳

宴坐巖

青青樗樹林下蔭蒼蘚石幽人宴坐時懷抱忘所
適不見算樵歸寒山雨中碧

遊龍潭

四客同笑言一僧陪杖屨徜徉山水窟適意忘晨
暮疎鐘巖北寺細竹溪南路中流石參錯不礙潺
湲溯泓澄小龍潭潤氣金碧聚時驚木葉墜俯見
儵鱗度斯遊非預期偶爾造佳處幼輿丘壑情陶
令琴觴趣淹留慰所願惟以賓友故夕陽淡寒山
遲迴未能去

入白水訪劉致中昆仲

夜雨歇清曉山椒雲氣昏駕言聊出遊窈窕窮川
原側帽避橫篠揚祛障晴瞰春泉散石壁細草羅

丘園陟峻已逾嶺窺深更緣源喬松俯澗折垂柯
激潺湲過瀨寒慘慘驚林白翻翻造幽景寥闕勝
絕難具論僕夫知余樂踟躕爲停軒惜無徒倚地
時來此開樽暮投鷺峰宿青燈耿柴門相從二三
子交情久彌敦談玄測象象攬佩紉蘭蓀願言固
所懷丘壑吾道尊

和李弼伯春懷

山寒古寺清斷續春朝雨遙憐遠客情寂莫誰晤
語平生氣軒昂失意今易與有酒卽佳辰無兵皆

樂土微吟對節物林靜幽花吐悠悠念鄉邑耿耿
悲豺虎知有濟時才從橫在談塵功名恐來遲老
翮期更舉

遊朱劭家園

晨暉麗丹楹翼翼侔帝居向來堂上人零落烟海
隅聯翩際時會振迹皆刑餘閨帷尚帝主阜隸乘
軒車流威被東南生殺在指呼樓船載花石里巷
無袴襦至今江左地風雲亦嗟吁叨榮已過量受
禍如償逋荒涼當門路尚想冠蓋趨客舸維岸柳

鄰人罾池魚徘徊極幽觀曲折迷歸途夜月扇綺
戶春風散羅裾繁華能幾時喪亂實感予曹鄴子
何譏此曹真人奴

晨興

晨興訪蕭寺爽氣清如沐坐看雨離山飛陰斷平
陸歸途阻夕漲竚立驚幽獨曳杖聽殘鐘却寄僧
坊宿

宿省軒

夜空合一寂擾擾息萬勞幽懷耿不寐孤燈側殘

膏稍知山雨來聲在橫林高凄然却成夢夢泛秋
江濤

涼月

涼月未出山浮雲半空白徘徊步軒窗宛若待佳
客經林漏飛輝映澈生華澤及茲秋景清吾廬更
幽寂殊觀發祕藏妙聽生寥闐營營息初機炯炯
懷新得豈無平生心所樂已非昔天旋河漢動夜
久鄰機息淒淒感庭蘭歲莫霜霰集呼兒溫濁醪
獨酌永今夕

秋懷

哲人嘆逝川志士悲廩秋流光不暫停忽忽歲欲
周涼飈襲迴野飛霜皓盈疇華林失鮮輝奔谿殺
湍流萬化儻日徂吾生寧獨留而我苦不樂彷徨
復何求世途多軌轍今行非昔謀徒遵耿耿意齟
齬固莫投時乎不再來豈余敢懷尤王道炳日星
歷聘疲軻丘歸歟旣改旆浩然亦回輶寂寞寧子
歌棲遲長卿遊客嘲徒自解天問終不酬長揖未
免烹說難竟遭囚行藏或大謬聖賢共悠悠含思

疚恒積念往川途修煌煌青春姿蹉跎恐茲由諒
非宏達觀那能齊百憂

朱松

題蘆雁屏

征鴻坐何事天遣南北飛蕭然如旅人無情自相
依孤葦吹欲折秋風不勝威冥冥一高翔空費弋
者機寒聲落烟渚相應不暫違嗟余識此情納手
空歎歛

和謝綽中觀瀾亭

五古四
方塘澹宿漲曲澗來飛湍光涵蔚藍天瀕洞碧玉
寬小亭塵土外瓦影浮朱欄霜渚寫秋色烟林養
漁竿美人秋霞衣皎皎明月冠欲濯且無塵隱几
得妙觀海若眩河伯等在蝸角端那知坳堂上杯
水生濤瀾

中秋夜雨

秋雲定何心忍翳今夕月尚嫌微點綴况乃都漫
滅他時任氛霾此際望清澈倦投衲子窗竹雨聽
騷屑對牀不成夢有酒那能設螢飛矜意氣蟲語

轉幽咽心知層陰表皎皎玉輪潔何當凌倒景徙
倚玩飛轍

秋懷

秋風未幾日我髮白已多千林了未覺奈此一葉
何安坐惜流光斜盼寄庭柯寒蟲獨何者唧唧夜
自歌

月林疎愈明露草淨可拭飛飛螢遞照軋軋蟲自
織移燈檢書讀千載如經夕微言契夙心妙解失
陳迹文章事雕琢回視真兒劇世無揚子雲此理

誰見直

坐睡

坐久睡屢兀手失未了書清風脫然至心醒得我
娛起看孤隙光了不移錙銖云何短夢中萬境生
須臾嗟彼市朝子百巧營其軀安知非夢境過眼
滅無餘

戲答胡汝能

我生苦中狹與世柄鑿乖平生素心人耿耿不滿
懷汝能伯始後遊世如嬰孩相逢握手語便作墳

筮諧時時笑謂我如子患未涯執古以稽今求合
誠難哉涉世幸未遠子車尚可回不見山巨源雍
容居鼎台寥落稽中散絕交良可哀

王庭珪

遊貢游洞

竄身楚西極幽奇頗窮歷况此古道傍橫天竦蒼
壁何年始開鑿工如鬼鑿刻飛空數百丈突出青
鯨額那知風雨時雲雷非窟宅事跡墮渺茫探討
失圖籍豈無高世士於此煉金液不能久徘徊上

馬空歎息

劉晞陽貧甚爨烟不屬讀書而不輟作詩
遺之以激其志因敘其貧之所以絲翼
當途有聞之者

荷鉏初讀書中原已鼎沸輟耕仰太息衣食尚卒
歲喧呼傳點丁田廬忽湮替產盡猶索租從何出
官稅乃知天寶後信如石壕吏君門九重深旗戟
森兵衛朱幡背相望莫肯察凋弊賴子天資高進
琢自成器時能從諸生扣門來問字長篇爛溢日

春葩吞奇麗苦飢不堪煮要自飽風味乃翁昔好
事賓客常滿位小兒聽客語炊餽忘箸筯豈慮飯
成糜爾來糜亦廢誰能饋升斗與子黔突喙

張九成

擬古

願隨春陽和不隨秋草萎光陰瞬息耳憂悲亦何
爲蘭蕙生深林時有朝露滋清香隨春風邈若有
所思我亦慕明德杖藜往從之林深不可見相遇
終有時

秋興

半夜驚夢回桐葉紛索索杖藜視天宇雨罷雲收
脚清風拂襟裾片月墮籬落嗟我遊已倦悵此久
淹泊豆畦今已花稻穰行可穫翻思黃卷中古人
誰可作田園愛潛歸簞瓢識顏樂譬彼鷓鴣心平
生在叢薄

出城望隔江茅舍

茅屋臨江上四面惟柴荆綠陰繞籬落窗几一以
明門前灘水急日與白鷗盟不知何隱士居此復

何營朝來四山碧晚際沙鳥鳴碁聲度竹靜江深
琴調清終攜一樽酒造門相對傾心期
皇上安用知姓名

辛未閏四月卽事

窮居不擇交賢否那復辨似人輒已喜况復曾半
面相見且寒温不問風雨變晚來無與遊澄江喜
如練攜筇信步行屈曲隨山轉數日雨不止衝波
頽激箭舊雨已不來今雨誰復見甕頭香滿屋吾
計今已辦豈復思故鄉無事且強飯

五古四
陳淵

越州道中雜咏

浮雲作秋陰細雨如朝霧放形山水間意適無艱
步忽遇古招提空翠森回互倚杖聽泉鳴悠然不
能去

陳深

姑蘇臺晚眺分得高字

殘陽古城曲岌岌崇臺高不知何年創尚爾結構
牢青山擁危楯白水環空濠美哉此山谿慘淡悲

雄豪當代一戰霸意氣何矜驕蛾眉坐傾城忠魂
隨怒潮空餘故宮苑寒雀飛野蒿佳辰晤良友清
眺舒煩勞夕風振藁薄鴻雁中天號永懷五湖客
一舸凌雲濤浩歌滄浪詞願言從遊遨

范浚

寓居寶惠寺喜晴登山

喜霽出招提愛山登業岌林端已殘照路草猶半
濕丹崖斷雲歸翠竇飛泉入長天沒鳥影遠水動
虹吸塵襟得延瞰爽氣橫來集欲逐野僧還更看

空翠立

洪适

擬古

青青河畔草英英籬邊菊
亭亭當窗女濯濯手如玉
淵淵錦中意粲粲未盈幅
藁砧天一涯刀頭誤行卜
却鏡怨新眉誰教遠山綠

吳儆

陽村道邂逅趙仁甫

修途轉清溪孤村帶寒月
蕭酒竹間亭意行成小

立賓主莫誰何悠然良自適
俄有貴公子青驄搖寶勒
下馬相勞苦呼酒道疇昔
遂令麋鹿姿頗爲人物色
佳實進霜堅異釀引寒碧
興盡還獨歸沙頭寒月白

早起

積雨霽窮秋柴扃立清曉
溪光照烟岫未覺秋容老
溪邊烏柏林他日沒飛鳥
濃陰半枯枝殷紅亂衰草
搖落想騷人洞庭風嫋嫋

汪友耕見訪不數日別去惡語爲贈兼簡

子用子美二友

負爨得老窮掃軌事幽屏
楚然羅雀門有客頽而
整悲歡十年別樽酒清夜
永妙句時驚人盈軸肯
傾廩三日語未休霜寒夢
歸省臨流分別袂波光
照孤影重念吾故人雪屋
清燈冷劉子抱遺經深
井汲修綆曹子中庸學天
理窮性命老驥鼓不作
搴旗望公等天晴風日佳
何時過甍徑石鼎燃豆
其水菹煮湯餅

周必大

陶淵明有已酉重九詩一首某以此年此
日舟次吉水距永和才一程耳輒用其
韻先寄諸兄弟

王覲十五載歸來稀舊交我髯昔已華
今茲固宜凋去國甫重五還家倏登高
永和有兄弟咫尺如烟霄緬懷江東使
地遠心更勞遙知上翠微江山勝金焦
豈無茱萸酒望望心鬱陶相從會有日
永矣非一朝

范成大

古風上湯丞相

抱瑟遊孔門豈識宮與商古曲一再行乃雜巴人
倡知音顧之笑解絃爲更張歸來掩關臥水炭交
愁腸平生桑濮手未省歌虞唐明發理朱絲復登
君子堂遺音入三歎山高水湯湯
空山學仙子窮年臥巖扃煮石不得飽秋髻蒼已
星道逢紫霄翁示我餐霞經采采晨之華滌濯腐
與腥向來役薪水終然稿柴荆跼謝起再拜飄飄
蛻蟬輕飛升那敢學儻許學長生

擬古

彎環樓前月掩抑樓上人人月不得語相看兩凝
顰面窗回紋機織遍錦字新聊可自持玩何由將
贈君

積雨倏然晴秀野若新沐芳草徑寸姿中有不勝
綠萋萋路傍情頗亦念幽獨驅馬去不顧腸斷招
隱曲

九月三日宿胥口始聞雁

故人久不見乍見雜悲喜新雁如故人一聲驚我

起把酒不能觴送目問行李曾云行路難空濛千
萬里塞北多關山江南渺雲水風高吹汝瘦旅伴
今餘幾斜行不少駐滅沒蒼烟裏羈遊吾亦倦客
程殊未已扁舟費年華短纜繫沙尾物性各有役
冥心聽行止江郊匝地熟場圃平如砥歸期且勿
念共飽豐年米

新嶺

瘦馬兀瞢騰荒鷄號蒼莽絲窠罽朝露籬落萬蛛
網宿雲拂樹過飛泉擘山響老桑踟潛虬怪蔓挂

騰蟒山行何許深空翠滴羈鞅釀愁積雨寒破悶
朝日放瞳瞳赤幟張昱昱金鉦上浮動草花馥清
和野禽唱僕夫有好語沙平路如掌惟憂三溪阻
橋斷山水漲

題徑山凌霄菴

峰頭非塵寰一舍誰所茆軒眉玉霄近按指沙界
豁萬山紛累塊衆水渺聚沫來雲觸石迴去鳥墮
烟沒向無超俗緣茲路詎可越偕行木上坐同我
證解脫

新館

露稻黏明璫風茅滾高浪荒荒白楊道行行亂蟲
響日脚午未吐雲頭晚猶漲欣此半日涼籃輿走
清曠病客不堪暑茲行天肯相蚊蟲掃無迹秋意
滿千嶂相尋泉石盟略褫簿書障鴿原定相念因
風報無恙

盤龍驛

聞鷄一唱罷占星三斗没天高月徘徊野曠山突
兀暗蛩泣草露怨亂語還咽涼螢不復舉點綴稻
花末惟餘絡緯豪悲壯殷林樾小蟲亦何情孤客
心斷絕魂驚板橋穿足側石子滑行路如許難誰
能不華髮高城謾回首疊嶂屹天闕遙知秋衾夢
千里一飄忽

千石嶺

晨光挂高嶺晴色媚遠客哀湍吼叢薄宿霧裊絕
壁露重蘚花紫風來蓬背白迷山朴渥跳飲澗於
菟迹層巔多朽木迤磴有飛石不知山幾重杳杳
入叢碧

曉出古城山

落月墮渺莽殘星澹微茫竹輿亂清溪飛蓋入嵐
光松檜霧靄濕桑麻風露香空翠滴塵纓何必濯
滄浪山家亦早起迨此朝氣涼林深無人聲木末
炊烟蒼離離瓜芋區肅肅棗栗場田園古云樂令
我思故鄉

再遊天王廣教院

遊山如讀書深淺皆可樂道傍小精舍亦自一丘
壑淒涼四十年始復重著脚老僧逝已久講坐塵

漠漠當時童子輩衰髯亦蕭索掃壁觀舊題歲月
真電雹文章卑不傳衣食窘如昨出門意惘然遼
海渺孤鶴

積書巖宋詩刪第五卷目錄

五言古詩五

陸務觀 二十一首

楊萬里 七首

王十朋 五首

朱熹 三十一首

呂祖謙 一首

張栻 二首

呂定 一首

裘萬頃 一首

趙師秀 一首

葉適 二首

樓鑰 一首

陳傅良 十一首

姜夔 一首

陳造 一首

積書巖宋詩刪卷五

錫山顧貞觀梁汾選
武陵胡獻徵存人閱

五言古詩五

陸務觀

秋郊有懷

楚人固多孱
妄謂秋可悲
寧知河嶽間
氣俗樂此時
壯士鳴雕弓
健馬嚼枯萁
日馳三百里
榆關赴戰期
陣雲壓龍庭
殺氣搖參旗
熾火燎狐兔
倒瀉

黃金卮勒銘燕然石千載鎮荒陲安能空山裏凍
研哦清詩

秋山瘦益奇秋水淺可涉出城西風勁拂帽吹脫
葉新霜拆栗罅宿雨飽豆莢枯柳無鳴蜩寒花有
穿蝶郊行得幽曠頗覺耳目愜斷雲北山來欣然
與之接挂冠易事爾看鏡歎勛業永懷桑乾河夜
渡擁馬鬣

入瞿唐登白帝廟

曉入大谿口是爲瞿唐門長江從蜀來日夜東南

犇兩山對崔嵬勢如塞乾坤峭壁空仰視欲上不
可捫禹功何巍巍尚覩鐫鑿痕天不生斯人人皆
化魚鼈於時仲冬月水各歸其源濫灑屹中流百
尺呈孤根參差層顛屋邦人祀公孫力戰死社稷
宜享廟貌尊丈夫貴不撓成敗何足論我欲伐巨
石作碑累千言上陳躍馬壯下斥棄騾昏雖慚豪
偉詞尚慰雄傑魂君王昔玉食何至歆雞豚願言
采芳蘭舞歌薦清尊

蟠龍瀑布

遠望紛珠纓近觀轉雷霆人言水出奇意使行人
驚人驚我何得定非水之情水亦有何情因物以
賦形處高勢趨下豈樂與石爭退之亦隘人強言
不平鳴古來賢達士初亦願躬耕意氣或感激避
逅成功名

寒夜遣懷

臨觴本不飲憂多自成醉四方行萬里不見埋憂
地憶昔入京都寶馬搖香駿酣飲青樓夜歌聲在
半空去日不可挽華髮忽垂領娟娟峨眉月相對
作凄冷月落照空牀不寐聽寒蟬早知憂隨人何
用去故鄉

謁漢昭烈惠陵及諸葛公祠宇

雨止風益豪雪作雲不動凄凉漢陵廟衰草臥翁
仲画妓空笙竽土馬闕羈鞅壤沃黃犢耕柏密幽
鳥哢尚想忠武公身任社稷重整整涓上營氣已
無岐雍少須天意定破賊寧患衆興亾信有數星
隕事可痛陵邊四五家茆竹居接棟手皸紙上箔
醅熟酒鳴甕雖嗟生理微亦足追飢凍劉葛固雄

傑閱世均一夢論高常近迂才大本難用九原不
可作再拜臨風慟

玉局觀拜東坡先生海外画像

商周去不還盛哉漢唐宋蘇公本天人謫墮爲世
用太平極嘉祐珠玉始包貢公車三千牘字字岌
飛動氣力倒犀象律呂諧鸞鳳天驥西極來矯矯
不受鞚飛騰上臺閣廢放落雲夢至寶不侵蝕終
亦老侍從晚途遷海表萬里天宇空豈惟騎鯨魚
遂欲跨螭螭心空物莫撓氣老筆愈縱粃糠郊祀

歌遠友清廟頌我生雖後公妙句得吟諷整衣拜
遺像千古尊正統

夜過魯墟

中夜過魯墟船底鳴細浪月出菱歌長林闌續火
壯故居不可識四顧俱青嶂百歲幾廢興撫事一
悽愴士生本耕稼時來偶卿相功名亦餘事所勉
在素尚况吾多難者久已冥得喪微祿行當辭没
身事幽曠

秋夜感舊十二韻

冷螢綴蓬根忽復照高樹年光逝不留百感集遲
算往者秦蜀間慷慨事征戍猿啼鬼迷店馬噤飛
石鋪色嶺高入雲朽棧劣容步天近星宿大江惡
蛟鼉怒意氣頗自奇性命那復顧最懷清渭上衝
雪夜掠渡封侯細事爾所冀垂竹素兜鍪竟何成
豈獨儒冠誤當時安校尉旗纛今照路浩歌遂成
章聊慰老不遇

齋中雜興

公議在天下如人有元氣平居失護養一旦可勝

諱神丹卒難求百疾起如蝟奄奄息僅屬熟視吁
可畏大義在春秋遺跡悲漢魏君看徐孺子底物
視富貴

昔我自蜀歸耆舊已凋喪後來二三公尚慰天下
望千里一紙書慇懃問亾恙嗚呼亦已矣遺語寄
悲愴我亦迫桑榆便恐無輩行夜窗對青燈力憊
心尚壯

書歎

齊民困衣食如疲馬息秣我欲達其情疎遠畏強

聒有司或苛取兼并亦豪奪正如橫江網一舉孰
能脫政本在養民此論豈迂濶我今雖退休嘗綴
廷議未明恩殊未報敢自同衣褐吾君不可負願
治甚飢渴

宋都曹屢寄詩且督和答作此示之

古詩三千篇刪取財十一每讀先再拜若聽清廟
瑟詩降爲楚騷猶足中六律天未喪斯文杜老乃
獨出陵遲至元白固已可憤疾及觀晚唐作令人
欲焚筆此風近復熾隙穴始難窒淫哇解移人往
往喪妙質苦言告學者切勿爲所怵杭川必至海
爲道當擇術

夜出偏門還三山

月行南斗邊人歸西郊路水風吹葛衣草露濕
屢漁歌起遠汀鬼火出破墓凄清醒醉魂荒怪入
詩句到家夜已半佇立叩蓬戶穉子猶讀書一笑
慰遲暮

豐城高安之間憩民家景趣幽邃爲之慨

然懷歸

數家聚雲根細路入叢薄濺濺石渠水來往一略
約有無鄰里通笑語父子樂濁醪時相就青蔬缺
鹽酪日暮歸閒門績火星煜爚先期畢租稅老不
入城郭嗟予獨何事早插紅塵脚故山未成歸悵
望有餘忤

雜興

孟子闢楊墨吾道方粲然韓愈排佛老不失聖所
傳伐木當伐根攻敵當攻堅坐視日月食孰探天
地全一木信難恃要憂大厦顛安得孟韓輩出爲

吾黨先

少年喜結交患難謂可倚寧知事大謬親友化虎
兕出仕五十年危不以讒死始畏囊中錐寧取道
傍李老來多新知英彥終可喜豈以二三君遂疑
天下士

昔我遊廬山夜雨東林雪灰深火正熟膏滅燈半
滅童驚林虎過僧惜澗松折至今每追想可解肺
肝熱那知蓬山夢忽似此清絕殊勝蘇子卿餐羶
持漢節

君子尚大節又甚惡不情魯連故可人用意終近
名千載高夷齊采薇忘其生周公述易象所以貴
幽貞去聖雖已遠江左見淵明我讀飲酒詩朱絃
有遺聲

送子龍赴吉州掾

我老汝遠行知汝非得已駕言當送汝揮涕不能
止人誰樂離別坐貧至於此汝行犯胥濤次第過
彭蠡波橫吞舟魚林嘯獨脚鬼野飯何店炊孤櫂
何岸檣判司比唐時猶幸免笞箠庭參亦何辱負

職乃可恥汝爲吉州吏但飲吉州水一錢亦分明
誰能肆讒毀聚俸嫁阿惜擇士教元禮我食可自
營勿用念甘旨衣穿聽露肘屨破從見指出門雖
被嘲歸舍却睡美益公名位重凜若喬嶽峙汝以
通家故或許望燕几得見已足榮切勿有所啓又
若楊誠齋清介世莫比一聞俗人言三日歸洗耳
汝但問起居餘事勿挂齒希周有世好敬叔乃鄉
里豈惟能文辭實亦堅操履相從勉講學事業在
積累仁義本何常蹈之則君子汝去三年歸我儻

未卽死江中有鯉魚頻寄書一紙

遣舟迎子適因寄

今日坼汝書一讀眼爲明知汝卽日歸明當遣舟
迎想汝片帆東翩若飛鴻征薄暮過梅市咿謳雙
櫓聲到家亦尚早城樓初發更草草一尊酒爲汝
手自傾夜分不能寐頓忘衰病嬰豈惟病良已白
頭黑絲生暫別亦不惡益重父子情自今日相守
北窗同短檠六經燄久伏百氏方縱橫世俗擯孤
學未易口舌爭此責在學者草萊勿自輕汝壯父

未死相勉在力行

石堰村

木落山不蔽水縮洲自獻寒日晚更明村巷曲折
見小婦鳴機杼童子陳筆硯農家雖苦貧終勝異
鄉縣君看宦遊子豈無墳墓戀生死在故鄉切勿
慕蔡傳

楊萬里

明發陳公徑過摩舍那灘石峰下

遙松烟未消近竹露猶滴石峰矜孤銳喜以江自

隔清潭涵曦紫碧岫過雲白回瞻宿處隄路轉不
可覓地迴人絕影山僻虎留跡下有無底潭上有
欲落石是間一徑橫夾以萬松直樹從何時有陳
公所手植陳公今焉在徑松自寒碧
昨宵望石峰相去無一尺今日行終朝祇繞石峰
側石峰何曾遠江路自不直仰瞻碧孱顏清峽如
立壁反覆得細看何必更登陟後顧江已迴前顧
江若塞簾欣入絕巘舟愕觸潛石東瞰淡未熹北
吹寒更寂岸草不知愁向人弄晴碧

危峰瑩無土平地宐孤石如何半巖間亦有小樹
碧走空根苦辛倚險榦寒瘠芳蘭間叢生紫蕤濯
幽色近香許世聞遠秀絕人摘而我雲外身方茲
喟行役

我從靈州來惟見芳草渡蒹葭隨水遠曠野無立
樹挂席上真陽好山忽無數好山如隱士避世不
自露不應官道傍乃有見山處惜識衛叔寶未覩
樂彥輔石峰再難得舟過更回顧

南中山絕佳所恨人烟稀略無好事人結茅臨深

溪峰頂可月亭岸石卽釣磯空令烟中猿挂崖弄
漣漪山多人自少人遠山益奇我舟行不留過眼
山如馳過眼意已足久留亦何爲

蘇木灘

灘雪清濺眸灘雷怒醒耳落洪翠壁立跳波碧山
起船進若戰勝船退亦遊戲若非篙師苦進退皆
可喜忽逢下灘舟掀舞快雲駛何曾費一棹纔瞬
已數里會有上灘時得意君勿恃

和陸務觀見和歸館之韻

君詩如精金入手知價重鑄作鼎及鼂所向一一
中我如駑並驥夷塗不應共難追紫蛇電徒掣青
絲鞵折膠偶投漆異榻豈同夢不知清廟茅可望
明堂棟平生憐坡老高眼薄蕭統渠將友猗那心
肯師晉宋破琴聊再行新笛正三弄因君發狂言
湖山春已動

王十朋

雜詩

直道疾伊優壯懷憎靡曼海上豕方牧夜中牛屢

飯半生營一名偃蹇未如願青銅忽自照白髮已
堪歎斥鷃適蓬蒿大鵬搏九萬物情貴得所奚用
求自獻富貴似可喜貧賤亦何怨

明畝

兀兀窗下士筆耕志良苦黃卷對聖賢慷慨深自
許一朝出干祿得失戰胸宇曲意阿有司諛言徇
人主貪榮無百年貽誦有千古丈夫宜自貴清議
重刀斧

贈梁同年

君家錦水邊我居浙江東各在天一涯芳尊偶相
同君方富青春勁氣吐長虹我老志亦衰倚麻媿
蒿蓬會合已踰月周旋見高風久客思故鄉歸心
各怱怱贈君無別言相期盡孤忠

荆婦夜績

涼颼墮黃葉促織催女工鬢絲不堪織細君哀我
窮青燈伴深夜績成寒素風願爲隱者衣德耀隨

梁鴻

前中秋一日舟過山陰晚稻方熟忽動鄉

思呈先之

西風吹白蘋遊子千里征扁舟入鑑湖水月相涵
明山陰晚稻熟萬頃黃雲平憑高屬遠目動我鄉
曲情豈不有一飽胡爲苦營營五年倦來往爭此
蝸角名未知得失間奚辱亦奚榮何當畢所願同
歸及春耕

朱熹

擬古

離離原上樹戢戢澗中蒲娟娟東家子鬱鬱方幽

居濯濯明月姿靡靡朝華敷昔爲春蘭芳今爲秋
靡蕪寸心未銷歇託體思同草

綺閣百餘尺朝霞冠其端飛欄麗遠漢曲楹何盤
桓清誼發徽音一唱再三歎借問誰爲此佳人本
邯鄲微響激流風浮雲慘將寒爲言何所悲遊子
在河關不恨久離濶但憂芳歲闌願爲清宵夢燕
昵窮餘歡

上林採薇蕨側徑多幽蘭采之不盈握欲寄道里
艱沈憂念故人長夜何漫漫芳馨坐銷歇徘徊以

悲歎

高樓一何高俯瞰窮山河秋風一夕至憔悴已復
多寒暑遞推遷歲月如頽波離騷感遲暮惜誓閔
蹉跎放意極驩虞咄此可奈何邯鄲多名姬素豔
凌朝華妖歌掩齊右緩舞傾陽阿徘徊起梁塵絳
縹紛衣羅麗服乘奇芬顧我長咨嗟願生喬木陰
夤緣若絲蘿

賦歸雲洞

人生信多患吾道初不窮云何感慨士伏死巉巖

中宜陽古道周竅石何嵌空窮幽歷肺腑履坦開
房櫳頗疑有畸人往昔寄此宮歲月詎云幾井竈
無遺蹤我來記清秋歸途渺窮冬興懷重幽討永
嘯回長風風回雲氣歸洞口春濛濛信美非人境
出門吾欲東

寄題金元貞長泰面山亭

抗心塵境外結宇臨秋山乘高一騁望表裏窮遐
觀衆嶸互攢列連岡莽縈環陽崖烟景舒陰壑悲
風寒碧草晚未凋林薄已復丹仙人羨門子歲晚

當來還

還家卽事

獻歲事行役徂春始言歸昔往草未芳今來翠成
幃扶疎滿園陰時禽互翻飛叢萱亦已秀丹葩耀
晨輝卽事誰與娛淹留自忘機日暮復出門悵然
心事違古人不可見獨掩荒園扉

和林懌之黃雲之句兼簡同遊諸兄

登覽日云宴歸車渺重岡天風振余旃夕露沾我
裳數子情未厭春山杳茫茫還瞻長江白迴眺飛

雲黃當念塵中友心期邈相望無爲跨鴻鵠決起
凌青蒼

過武夷作

弄舟緣碧澗棲集靈峰阿夏木紛已成流泉注驚
波雲關啓茫茫高城鬱嵯峨眷言羽衣子俛仰日
婆娑不學飛仙術纍纍丘塚多

秀野以喜無多屋宇幸不礙雲山爲韻賦

詩熹伏讀佳作率爾攀和韻劇思慳無
復律呂笑覽之餘賜以斤斧幸甚

西山一何高雲氣出寒麓中有無事人鳴泉遶茅
屋宴坐今幾何無以媚幽獨興至偶成篇呼兒爲
余讀

我居深山中茅舍破不補上見風攪林下有雲承
宇聞公落新宮戶牖不可數懶惰心力衰念公亦
良苦

夜吟招隱詩月落寒泉井自非千載人誰與共清
景散髮心朗寥凝神味淵永功名恐相期富貴非
所幸

仙人空山居道意妙羣物度世君則然修身吾豈
不飛行仰雲路趺坐探理窟獨夜扣星壇清齋且
簪笏

川上見月歸示同行者

川上偶攜手皓月起林端一舒臨流望玄露已先
溥歸掩荒園扉更怯衣裳單清夜誰晤言獨處難
爲歡

秋蘭已悴以其根歸學古

秋至百草腓寂莫寒露滋蘭皋一以悴蕪穢不能

治端居念離索無物遺所思願言託孤根歲宴以爲期

雪亭

危亭竹柏間峭蒨自幽絕朔風一以厲愛此枝上雪仰悲立景駛俯歎羣芳歇不用此時來那知歲寒節

齋居聞磬

幽林滴露稀華月流空爽獨士守寒棲高齋絕羣想此時鄰磬發聲合前山響起對玉書文誰知道

機長

客舍聽雨

沈沈蒼山郭暮景含餘清春靄起林際滿空寒雨生投裝卽虛館簷響通夕鳴遙想山齋夜蕭蕭木葉聲

卜居

卜居屏山下俯仰三十秋終然村墟迴未愜心期幽近聞西山西深谷開平疇茆茨十數家清川可行舟風俗頗淳朴曠土非難求誓捐三徑資往遂

一壑謀伐木南山顛結廬北山頭耕田東溪岸濯
足西水流朋來卽共懽客去成孤遊靜有山水樂
而無身世憂著書俟來哲補過希前修茲焉畢暮
景何必營菟裘

遊天池

三年落星渚北望天池山臨風幾浩歎欲往無飛
翰今朝復何朝陟此青雲端高尋已奇絕俯瞰何
其寬西窮濂溪源東盡溢城關渺然滄波外淮山
碧連環我意殊未極更思出塵寰何當駕輕鴻八
表須臾間視此長江水滔滔儻西還

臥龍菴武侯祠

空山龍臥處蒼峭神所鑿下有寒潭幽上有明河
落我來愛佳名小築寄幽壑永念千載人丹心豈
今昨英姿儼繪事凜若九原作寒藻薦芳馨飛泉
奉明酌公來識此意顧步慘不樂抱膝一長吟神
交付冥漠

落星寺

浩浩長江水東逝無停波及此一回薄湖平烟浪

多孤嶼屹中川層臺起周阿晨望愛明滅夕游驚
蕩摩極目青冥茫回瞻碧嵯峨不復車馬迹唯聞
榜人歌我願辭世紛茲焉老漁蓑會有滄浪子鳴
舷夜相過

石馬斜川之集分韻賦詩得燈字

改歲風日好出門欣得朋復招里中彥及此雲間
僧行行涉清波斯亭一來登徙倚綠樹蔭摩挲蒼
石稜遙瞻原野春仰視天宇澄一水旣紆鬱羣山
正峻嶒時禽悅新陽潛魚躍輕水却念去年日俯

仰愁予膺長吟斜川詩日落寒烟凝暝色變晴景
清尊照華燈顏顏感川徂稚齒歡年增酒盡不能
起朱欄各深凭

行視武夷精舍作

神山九折溪沿泝此中半水深波浪濶浮綠春渙
渙上有蒼石屏百仞聳雄觀嶄巖露垠堦突兀倚
霄漢淺麓下縈迴深林久叢灌胡然闕千載逮此
開一旦我乘新村船輟棹青草岸榛莽喜誅鋤面
勢窮考按居然一環堵妙處豈輪奐左右轟奇峰

躑躅極佳玩是時芳節闌紅綠紛有爛好鳥時一
鳴王孫遠相喚暫遊意已愜獨往身猶絆珍重舍
瑟人重來足幽伴

六月十五日詣水公菴雨作

雲起欲爲雨中川分晦明纔驚橫嶺斷已覺疎林
鳴空際旱塵滅虛堂涼思生顏簷滴瀝餘忽作流
泉傾况此高人居地偏園景清芳馨雜峭禱俯仰
同鮮榮我來偶茲適中懷澹無營歸路綠泱泱因
之想巖耕

春日言懷

春至草木變郊園猶掩扉茲晨與心會覽物徧芳
菲桃萼破淺紅時禽悅朝暉泉谷暖方融原田水
初肥東作興庶眦歲功始在茲端居適自慰世事
復有期終然心所向農畝當還歸

酬祕閣張丈簡寂之篇

勞農會稽宅息駕丹元鄉丹元不可見翠壁空雲
房是時中春月暄風發新陽白水注幽壑綠樹敷
崇岡俯聽足怡悅仰觀共徜徉班坐得瑤草傾壺

得瓊漿長吟遊仙詩亂以招隱章忽忽林景西躡
踏申慨慷坐上江湖客兀傲鬚眉蒼逸氣邁霄漢
英詞吐琳琅思與泉石勝韻隨笙鶴翔追遊不敢
及咏歎何能忘

秋懷

懷疴坐竟日晚色散幽樹寂歷候蟲悲沆瀣碧草
露端居興方淡沈默自成趣羽觴歡獨持瑤琴誰
與晤空知立思清未惜年華度美人殊不來歲月
空遲暮

井梧已飄黃澗樹猶含碧烟水但透迤空齋坐蕭
瑟端居生遠興散漫委書帙愛此北窗閒時來岸
輕幘微鐘忽迢遞禽語破幽寂魂神爲悄然淡泊
念所適

答王無功在京思故園見鄉人問

我從銅川來見子上京客問我故鄉事慰子羈旅
色子問我所知我對子應識朋遊總強健童穉各
長成華宗盛文史連墻富池亭獨子園最古舊林
間新垌柳行隨堤勢茅齋看地形竹從去年移梅

是今年榮渠水經夏響石苔終歲青院果早晚熟
林花先後明語罷相歎息浩然起深情歸哉且五
斗餉子東臯耕

拜張魏公墓下

衡山何巍巍湘流亦湯湯我公獨何往劍履在此
堂念昔中興初孽豎倒冠裳公時首建義自此扶
三綱精忠貫宸極孤憤摩穹蒼元戎二十萬一旦
先啓行西征奠梁益南轅撫江湘士心旣豫附國
威亦張皇縞素哭新宮哀聲連萬方黠鹵聞褫魄

經營久徬徨玉帛驟往來士馬且伏藏公謀適不
用拱手遷南荒白首復來歸髮短丹心長拳拳翼
感格汲汲勤修攘天命竟難諶人事亦靡常悠然
謝台鼎騎龍白雲鄉坐令此空山名與日月彰千
秋定軍壘岌業遙相望賤子來歲陰烈風振高岡
下馬九頓首撫膺淚淋浪山頽今幾年志士日慘
傷中原尚荆棘人類幾豺狼公還浩無期嗣德煒
有光恭惟宋社稷永永垂無疆

呂祖謙

野步

石梁俯清流苔髮明可數
茆簷春晝長寂寂亭陰
午鳥啼花徑深風絮浩
無主幽人不可覲棋聲時
出戶

張拭

嶽麓書院

遊觀不作難呼舟渡清泚
新晴宿潦淨羣山政如
洗上方凭危欄萬象見根
柢寒泉自可斟况復雜
肴醴高談下夕陽邂逅
玄鑰啓中流發浩歌月色

在波底

灑山

灑江卽湘江澱澱清見石
其東列羣峰秋水碧復
碧日出霧露收草徑上
逼側憑欄舒望眼已足
慰疇昔更窺岩穴勝創
見爲驚惕如何數里間
奇觀屢接跡寬同厦屋
深劃若巨靈擘日月遞
光景風雲變朝夕石橋
幾年成乳竇一時滴神
龍舊隱處仰視多辟易
蛻跡凜猶存隱隱印霜
脊下有澄湫深餘波漱
蒼壁往者已仙去來者
此其宅薄晚叩

松關風過聲索索聊麾車騎退容我且散策却望
訾家洲輕舫渡前磧回首烟樹林已復挂蟾魄宇
曠淨餘滓羣物被光澤河洲寄遐思空岩皎虛白
清輝猶可窺水色相激射天邊與川上亭亭如合
璧居然廣寒遊不用假六翮

呂定

追和蘇子瞻遊峽山寺韻

山迴寶華閣水遶金鎖灣塵慮頓焉息於茲開我
顏疎鐘日夕動老僧林下還天風吹白雲悠悠滿

松關歸猿有餘悲月明嘯空山僊人自何來翱翔
八極間手把玉芙蓉吟笑鏘珮環歌罷忽飛去千
峰堆翠鬢

裘萬頃

出門

出門復入門吾行竟安之攜書北窗下翻閱聊自
怡有懷千載人掩卷還歔歔采采首陽薇戀戀商
山芝一裘或終身欣然釣江濬斯人不可作斯道
日湮微目前稻梁謀鳧雁方齊飛青田寂無音歲

晚將疇依慎勿出門去塵埃染人衣

趙師秀

後哀

交交谷鳥哀鬱鬱澗松折山民無還期春物失怡
悅平生感斯人難以常理說共智已則愚忽巧衆
亦拙芳名信可垂在世何寂滅含悽爲卜兆窀穸
利茲月行當宿草生難使我淚歇未知百年後誰
復耕此穴寄言苦吟者勿棄攝生訣

葉適

送林退思四川分司茶馬幹官

棄繻詆關吏廣殿射高名方從媚子引豈料讒夫
傾京師恩暮降蜀道險朝升執手郭西門惻愴難
爲情有山擎空雪有谷匝底冰鳥樂謾後噪猿孤
定先鳴漢中王霸地從古鋒鏑爭崩摧韓信壇闕
落張魯營感子奮衣去氣猛意自輕笑我老何怯
萬里看橫行

張氏東園送王恭父得殿字

燕鴻不相須進趣自求便余來君其館乃復當我

餞一春三月雨亭樹鬱霧澱絮重厄飛揚花蔦堆
紫茜縱有百壺清何能一笑遣爲郎昔同甲四海
初會面凜然抱英特霜宇搏溫霰雄辭推落筆一
語不可選重來更純粹玉琢金就鍊漢家闡道術
四達詔羣彥談經石渠觀會議白虎殿通方要歸
宿立異豈夸衒子行若微罪天意委深眷以其今
固辭可信非始戀楚熱宜縐絺峽漲難短牽回舟
泊書林及此未掩卷

樓鑰

跋汪季路所藏修禊序

永和歲癸丑羣賢會蘭亭流觴各賦詩風流見丹
青右軍草禊序文采燦日星選文乃見遺至今恨
昭明字畫最得意自言勝平生七傳到永師襲藏
過金籛辯才尤祕重名已徹天庭屢詔不肯獻託
言墮戎兵妙選蕭御史微服山陰行譎詭殆萬狀
徑取歸神京辯才恍如失何異勅六丁文皇好已
甚丁寧殉昭陵當時馮趙輩臨寫賜公卿惟此定
武本謂出歐率更採擇獨稱善遂以鑄瑤瓊流傳

迨五季皆在御寢局耶律殘石晉睥睨不知名意
必希世寶璫裏載輜駟帝躬旣北去棄與朽壤并
久乃遇知者龕置太守廳或云政宣間此石歸紹
彭又言入內府宣取恐違程焚膏繼短晷拓本手
不停疊紙至三四肥瘠遂異形南渡愈難見得者
輒相矜我見十數本對之心欲醒汪侯端明子嗜
古自弱齡錦囊荷傾倒快覩喜失聲帶流及古天
往往字不成而獨此全好護持如有靈元王號博
雅異論誰與評硬黃極摹寫唐人苦無稱贗本滿

東南瓊瑣不足呈猶有婺與撫砥硤近璜珩右軍
再三作已覺難稱情心摹且手追安能效筆精響
榻固近似形似神不清不如參其意到手隨縱橫
况我筆素拙何力望羣英近亦得舊物庶幾窺典
刑此本更高勝著語安敢輕孤風邈難繼悵望冥
鴻征

陳傅良

送謝希孟歸黃巖

紛紛竹帛傳浩浩金石刻淪亾已無限存亦誰愛

惜如何伏羲氏文字二三畫姬孔豈不聖用以演
周易

法令如牛毛斯鞅信手成簿書積丘山趙張眼愈
明萬人立下風國勢尊且榮未省三代前誰獨有
此名

圭璧襲纁藉山龍飾衣裳不聞燧古初而興自虞
唐毀車崇騎射隸作篆籀藏至今人便之秦亦忽
以亾

累觴以爲歡班荆以爲儀交際貴如此勿使至意
虧頗常怪小雅鹿鳴至魚麗賓主禮百拜六經似
支離

送趙叔靜教授閩中

讀書須讀經學文須學古青山故不換白髮早可
數我亦窶人子風雨蔽蓬戶胡爲數相就夜話恒
過午

寄題陳同甫抱膝亭

稻梁不難謀軒冕亦易得胡爲抱膝翁惻惻復惻
惻秋風墮碧梧鳳鳥去無迹愁吟草際蛩兒女淚

盈臆忽然一長嘯孤響起空寂令人識雅頌一唱
三歎息室廬在路傍耕鑿在民籍行人聽笑語稚
子共眠食讀書果何罪鬚髮又半白此意太勞勞
此身長抑抑抱膝且不可出門更何適但勿問門
外蓬蒿若干尺

送王南強赴紹興簽幕

詞章行天下嘉賴二百年甲科至公卿誰敢謂不
然有人妄媒孽一世所棄捐我亦欲護短諱不言
幽燕汗簡在吾後覆車在吾前

人人尊孔孟家家誦詩書未省有宇宙孰與今多
儒儒者道如砥豈其自崎嶇申以黃老廢賈以絳
灌疎漢家嘗紛紛政爾門戶殊

送范憲東叔帥潼川

離逾十年合合復十月離往日苦無及來日忽未
知江源與海通吳會與蜀違通固天道常違亦物
理宜勿作兒女感是中有精微

相從意氣豪相知髣毛班細說竟昨非淺斟始今
歡每懷吾黨多未救此世難一則琢冰雪再則紉

芝蘭騷人絕芳潔孰與風人寬

讀范文正公神道碑有感佚事

武侯不可致玄德造其廬公在衰經中乃上時政
書維時君臣定事與草昧殊出處千載同豈必名
迹如行伍拔大將寒饑得名儒推轂天下士百年
用其餘生平慕河汾未許王魏俱殷勤八司馬意
獨何區區自古朋黨論消復莽無期誰令羣疑亾
韓富乃有爲惜哉公不見功名止西墜

姜夔

夏日寄朴翁時在靈隱

風吹松樹枝懷我松間友雲從北山來令我屢回
首山雲夜夜起山雨侵人衣遙知竹窗裏自吟新
雨詩

陳造

蕪湖感舊

下帆同鳥棲挂帆逐鷄起但見蕪湖月耿夜清如
水江左此壯縣我昔舟屢艤諸公各敬客款曲豈
今比酒杯慣邀留妓圍供燕喜流連動十日揮掃

或千紙舊游想如昨故交今餘幾逝者泉壤隔存
者參辰似浪憑楚些招孰寄相思字可能喚巫陽
且欲託雙鯉

積書巖宋詩刪第六卷目錄

五言古詩六

黃幹 四首

敖陶孫 一首

林亦之 一首

劉宰 一首

戴復古 三首

嚴羽 七首

魏了翁 一首

真德秀 三首

方岳 一首

王柏 一首

劉克莊 五首

戴昺 二首

文天祥 六首

謝翱 三首

王 鎡 一首

何夢桂 一首

汪元量 二首

劉 壘 一首

梁 棟 一首

林景熙 九首

程自修 一首

王 澹 一首

皇甫明子 一首

鮑 輶 一首

孫 璉 二首

楊 雯 二首

黃文雷 一首

道 潛 十二首

志 詮 一首

惠 洪 七首

契 嵩 一首

韓希孟 一首

積書巖宋詩刪卷六

錫山顧貞觀梁汾選

武陵胡獻徵存人閱

五言古詩六

黃 幹

侍文公飲浮翠用劉叔通韻

涼風振幽壑陰雲翳前山高懷厲清秋適意林莽
間烟橫萬家井水淨雙溪灣徙倚暮忘歸人境相
與閒遊子獨何為千里方言還陪此杖屨遊忘彼

道路艱心期更他歲依巖結柴關

與胡伯履

白露下百草玄雲翳崇岡遊子暮何之
倏若孤雁翔朝發長沙渚夕息湘山陽
飛鳴念儔侶慷慨增悲傷故人懷我深
遠寄金玉章開緘且疾讀慰此饑渴腸
是時星中火朔風掃枯黃歲月能幾何
臯蘭結微霜脂車策良馬日暮道正長
徒僕審驅馳前途畏榛荒劣質苦難任
白雲懷故鄉南山一舍隔矯首空西望

答曾伯玉借長編

白露下百草迅商薄修林幽人起長歡
感此節物深攬衣自徘徊撫劒還悲吟
丈夫各有志莫作兒女心涉遠當疾趨
畏影須就陰願言理輕車去上南山岑

拜文公先生墓下

暝投大林谷晨登翠如亭高墳鬱嵯峨
百拜雙淚零白楊自蕭蕭宿草何青青
悲風振林薄猿鳥爲悲鳴音容久寂寞
欲語誰爲聽空使千載後儒生

抱遺經

敖陶孫

佳人佩明月贈俞德章

佳人佩明月笑語含春姿手握幽蘭叢照影清漢
湄少年冶遊子行樂方及時折茗戲相贈玉色頰
自持歸來種白璧日漚文錦絲加幣欲聘子常恐
歲月遲終然不可諧翁歛聽所之願言遺薌澤遠
慰千里思

林亦之

丁亥九月十六夜偕李監倉宿龍臥山中

聽雨看月同時事也所謂魚與熊掌兼
得之賦詩一篇以紀其事

相喚此山來狂風吹我衣把酒桂花下山雲片片
飛掩門雨初滴開門月還上倚樹看月明半山聞
雨響人間有佳景詩句頗發越何曾似今夕聽雨
還看月

劉宰

松風軒晚望

遠山亞歸雲近山留夕照澄江橫淨練怒風收衆
竅東南佳山水此地宅其要連甍三萬家金壁互
輝耀閑房列歌舞傑觀富登眺物理會有極却慮
成悲嘯我家三茆峰一室倚青峭下視荆溪水水
深魚可釣歸歟有成計靜坐觀衆妙功名付公等
連茹祇明詔他年問無恙短策寄嶺嶠浩歌暢幽
懷狂斐君勿誚

戴復古

婕妤詞

紈扇六月時似妾君恩重避暑南薰殿清風隨扇
動妾時侍君王常得沾餘涼秋風颯庭樹團圓無
用處妾亦寵顧衰棲棲度朝暮扇爲無情物用舍
不知恤妾有深宮怨無情不如扇

松江舟中

秋風吹客衣歸興浩難寫寒林噪晚鴉紅日墮平
野篙師解人意棹酒旗下

求先人墨蹟呈表兄黃季文

我翁本詩仙遊戲滄海上引手掣鯨鯢失脚墮塵

網身窮道則腴年高氣彌壯平生無長物飲盡千
斛釀傳家古錦囊自作金玉想篇章久零落人間
眇餘響搜求二十年痛淚濕黃壤君家圖書府墨
色照青嶂我翁有遺迹數紙古田樣髣髴鍾王體
吟句更豪放把玩竹林間風寒凜悽愴昂昂野鶴
姿愧無中散狀兒孤襁褓中家風隨掃蕩於茲見
筆法可想翁無恙託君名不朽斯文豈天相舊作
忽新傳識者動慨賞嗟予忝厥嗣朝夕愧俯仰敢
墜顯揚思幽光發草莽假此見諸公丐名松栢壙

君其啓惠心慰此九泉望

嚴羽

關山月

今夜關山月偏能照馬鞍盧龍征戍客圓缺幾回
看遙想金閨裏應悲玉露寒黃沙三萬里何日是
長安

塞下曲

鞍馬連年去關河萬里賒將軍思報國壯士恥還
家大漠春無草天山雪作花誰憐李都尉白首沒

黃沙

朝日臨高臺

朝日臨高臺
睠彼芳樹間
上有共棲鳥
和鳴何關
關爾乃慕儔
侶我胡獨不
然良友在萬
里邈然河
與山聚會豈
不思歲月倏
已殫未必無
他人要非
心所歡

行子吟

行子在江海
飄飄靡常踪
有如芒碭野
朔風捲飛蓬
朔風無休期
飛蓬日千里
散落天地間
寧有復

歸理塞鴈西北來
一叫三徘徊
何時別沙溪
昨夜宿陽臺
同羣一相失
羽翮常低摧
人物有殊性
奈何罹此哀

憶昔客遊初
結交重豪邁
高冠湛盧劍
志若輕四海
白首悔前圖
蹉跎天一隅
寒冬劍門道
失路空脚躄
深林聚虎豹
絕壁號猩鼯
雪深車軸折
征馬驚啼呼
何當返故處
餐黍居田廬
淚下不能禁
腸轉如轆轤

我友遠言邁

朔風卷秋樹白日寒無光是時鴻雁來四野何蒼
茫我友遠言邁使我結中腸如何攜手歡一旦成
異鄉行旅有期程遊子多悲傷置酒欲高歌淚來
沾我裳四座慘相顧征馬亦徬徨未知會面日且
復盡茲觴

山居卽事

稍欣入林深已覺煩慮屏霜果垂秋原歸禽度嵐
嶺紛紛葉易積漠漠雲欲盛澗底寂無人松蘿窅
然暝惟聞山鳥啼月上柴門靜終歲寡持醪延歡
聊煮茗羣書北窗下帙亂誰能整

魏了翁

登萬象樓和計次陽韻

塵纓羈我身對景慵著語青山喚倚欄壯氣臨頽
汝層雲卷油幕萬嶺眇烟縷酒闌一橫笛樓前葉
似雨

真德秀

登南嶽山

烟霞本成癖况復遊名山舉手招白雲欲納懷袖

間奇峰七十二羅列皆蒼顏振衣遇長風浩浩天
地寬

司理弟之官岳陽送別定王臺悽然感賦
定王百尺臺長安萬里日昔人思親心山川誰能
局於焉共登臨使我增感觸微霜隕陔蘭悲風撼
庭木銀山在何許白雲但空谷搔首重裴回冥冥
江樹綠

先民不可見懷哉金玉音士雖一命微愛物宜存
心矧茲園扉內白日變重陰求情箠楚下寃哉詎
能禁諱嗥漫弗省鬼神爲悲吟子往涖其職朝夕
惟欽欽祥刑勿留獄斯語真良箴

方岳

別蒙姪

嗚呼吾與汝生世何不辰每思十年事雪涕時沾
巾方予第奉常堂有未老親當時爾父母綠髮猶
青春乃各不待年拱木號蒼旻禍予不自殞降喪
胡太頻骨肉纔百指踵作松下塵乃今所存者欲
言鼻酸辛我父惟我爾爾父惟爾身綿延僅不絕

一絲引千鈞所以叔姪間不翅父子真豈不念爾
孤聚族守一貧曰惟門戶故戀戀官倉陳雅欲携
爾俱守舍無可人向來惡少子覆轍那可遵磨門
故自佳爾學憂荆榛索居寡師友則與不學均老
夫本無侶嗜書如嗜醇少時共燈火往往夜嚮晨
但患業不精寧爲父母嗔爾今旣婚冠不與童兒
鄰一念及泉壤於何敢因循此身所係重安事予
諄諄俚諺亦有之一日計在寅豈伊拾青紫聲利
雙朱輪胸中無古今幾何不凡民嗟予父祖曾百
長此紙其書紳

王柏

和葉聖子小桃源韻

二仙何如人夫豈古隱士道成邈次寥佯臥不再
起鸞鶴舞松聲蕭騷快心耳金竈清塵生餘丹不
輕委我來桃源遊直窮路所止飛蘿搖春烟素雪
歆清泚何時架草堂深入此山裏翛然逃世慮鍊

魄繼遐軌

劉克莊

棲霞洞

往聞耆老言茲洞深無際閭中或識路塵外別有
世幾思絕人事齋糧窮所詣棊終出易迷炬絕入
難繼孤亭渺雲端于焉小休憩憑高眺城闕擾擾
如聚蚋盡捐滓穢念遂有飛舉勢山靈媚清遊雨
意來極銳濛濛濕莎草浥浥涼松桂暝色不可留
悵望巖扉閉

戴秀巖

茲巖視諸峰厥狀尤崢嶸舊爲碧蘚封新有朱棧
橫縻腰尚恐墜束炬差可行外狹中乃寬始聞俄
忽明仰窺神魄悸俯顧形殼輕遂覽丹爐基微聞
玉鼓聲源深足力盡路黑雲氣生不辨晝夜分恍
疑世代更嘗言學神仙所得由專精豈無諸名士
羨彼一老兵欣然約同志逝將尋此盟安知無白
鹿絕頂來相迎

答李泉州元善

平生陳無已白首欠吟債未嘗交馬呂况曾見章
蔡附熱生可鄙中寒死亦快吾方尚此友巾車與
同載前瞻有膺滂却顧有融泰要當堅一壁詎可
立兩界恕乎行誼虧希也名節壞史君惠良箴下
走敢不拜懷哉道義交異彼姑息愛

發臨川

始予卅角來家君縮銅墨縣齋多休暇縣圃足戲
劇雖云嗜梨栗亦頗窺簡冊弟妹俱孩幼親髮方
如漆後子捧檄至軒蓋候廣陌於時志氣銳門戶

况烜赫羣花照席紅湖柳拂鞍碧耆老互訊問酒
餼紛狼籍今子挑包過城郭宛如昔高年彫落盡
滿眼少朋識管子仕瘴烟屈叟掩泉窆華門訪舊
師目闇面黎墨買醪與之酌往事話歷歷旣生異
縣感復起故鄉憶吾翁墓草深高堂已斑白貧居
修瀛空遠遊溫清隔二季官海濱女子各有適曾
不如阿奴碌碌在母側回思盛壯時去矣難復得
因成臨川吟吟罷淚橫臆

上巳與二客遊水月洞分韻得事字

勝踐造物慳貧交世情棄昔戒十客來且無一人
至惟余暨兩君鼎足坐水次但言天氣佳誰謂風
土異高吟雜騷選序酌逮髻穉滌厓去惡詩捫石
認缺字古來幾襖飲傳者纔一二蘭亭感慨多未
了生死事杜陵更酸辛窮眼眩珠翠旨哉茲日遊
超然遺塵累消搖千載後尚有浴沂意巖扉滑如
玉歲月可鐫識

戴昂

侍屏翁遊屏山分得水字

携琴入空山修竹翠相倚一曲千古心泠泠寄流
水拂雲臥白石冥搜契玄理時有采薪人歌聲隔
林起

秋日過屏山菴

淒切抱葉蟬間關栖樹禽入山本避喧復愛聆此
音微颺動夕爽薄雲散秋陰衆籟闐以靜片月生
東林

文天祥

送行中齋

秋氣晚正烈客衣早知寒把衣不能別更盡此日
歡出門一萬里風沙浩漫漫豈無兒女情爲君思
汎瀾百年有時盡千載無殊觀明明君臣義公獨
爲其難寧受百折苦願持一寸丹會須撫卷人孤
燈起長歎

發魚臺

晨炊發魚臺碎雨飛擊面團團四野周冥冥萬象
變疑是江南山煙霧昏不見豈知此中原今古經
百戰英雄化爲土飛霜灑郊甸天寒日欲短遊子

淚如霰

題宣州壘嶂樓

初日照高樓輕烟在疎樹峨峨遠岫出泯泯清江
去簷隙委殘雷屋隅連宿霧蒼蔚互低昂熹微分
散聚城郭諒非昔山川儼如故童鬢已零落姝顏
慰遲暮沈沈澹忘歸欲歸重回顧

送劉其發入蜀

秋風淒已寒蜀道阻且長虎狼伏原野欲濟川無
梁客從何處來云我之西方蕭蕭驪驪鳴熠熠湛

盧光昔時榮華地今爲爭戰場將軍揚天戈壯士
發戎行江南有羈鳥悠悠懷故鄉駕言與子遊雲
天何茫茫

贈許伯溪惟一

長風吹飛藿蜻蛉吟野草流光速代謝興懷令人
老遊子中夜起悠悠酣且歌明月委清照江湖秋
涉多豈無臨淄魚亦有邯鄲酒懷古招王孫登高
重回首

正氣歌

余囚北庭坐一土室室廣八尺深可四尋單扉
低小白間短窄汗下而幽暗當此夏日諸氣萃
然雨潦四集浮動牀凡時則爲水氣塗泥半乾
蒸漚歷瀾時則爲土氣乍晴暴熱風道四塞時
則爲日氣簷陰薪爨助長炎虐時則爲火氣倉
腐寄頓陳陳逼人時則爲米氣駢肩雜選腥臊
汗垢時則爲人氣或圃溷浮屍或腐鼠雜出時
則爲穢氣疊是數氣當者鮮不爲厲而余以孱
弱俯仰其間于茲二年矣是殆有養致然爾然

亦安知所養何哉孟子曰我善養吾浩然之氣
彼氣有七吾氣有一以一敵七吾何患焉况浩
然者乃天地之正氣也作正氣歌一首

天地有正氣雜然賦流形下則爲河嶽上則爲日
星于人口浩然沛乎塞蒼冥皇路當清夷含和吐
明庭時窮節乃見一一垂丹青在齊太史簡在晉
董狐筆在秦張良椎在漢蘇武節爲嚴將軍頭爲
嵇侍中血爲張睢陽髯爲顏常山舌或爲遼東帽
清操厲冰雪或爲出師表鬼神泣壯烈或爲渡江

楫慷慨吞胡羯或爲擊賊笏逆豎頭破裂是氣所
磅礴凜冽萬古存當其貫日月死生安足論地維
賴以立天柱賴以尊三綱實係命道義爲之根嗟
余邁陽九隸也實不力楚囚纓其冠傳車送窮北
鼎鑊甘如飴求之不可得陰房闐鬼火春院闕天
黑牛驥同一皂鷄棲鳳凰食一朝蒙霧露分作溝
中瘠如此再寒暑百沴自辟易嗟哉沮洳場爲我
安樂國豈有他繆巧陰陽不能賊顧此耿耿存仰
視浮雲白悠悠我心悲蒼天曷有極哲人日已遠

典刑在夙昔風簷展書讀古道照顏色

謝翱

遠遊篇寄府教景熙

朝遊扶桑根不折拂日枝莫食楚萍實掬海見虹
霓黃鵠別我影日盡漢水湄况復銜其子風露何
當歸飄蕭青桂叢零落紫苔衣夢魂知爾處落羽
在瑤池

九日前子善來會山中

朝尋寒露枝莫摘不盈把風吹西南雲幽情誰與

寫有客來縉州遺我古蓋傘中有鴛鴦文色如銅
雀瓦浮以鬱金蕤蒼蘚藉其下此物寧足感聊用
助歌者但懷郢曲悲豈計所知寡

效孟郊體

閒庭生栢影荇藻交行路忽忽如有人起視不見
處牽牛秋正中海白夜疑曙野風吹空巢波濤在
孤樹

王 鎡

塞上曲

黃雲連白草萬里有無間霜冷鬪饑哭天寒甲胃
閒馬嘶經戰地鵬認打圍山移戍腰金印將軍度
玉關

何夢桂

擬古

生爲結髮婚死爲同穴鬼豈意冰上緣淪沒隔萬
里半鏡隨塵沙嫁衣在中笥紅絲倘未絕白首尚
歸止心隨碣石雲淚落銅盤水雲飛會南來水流
還北徙此生不可期心在應來世

汪元量

北征

北師有嚴程挽我投燕京挾此萬卷書明發萬里
行出門隔山嶽未知死與生三宮錦帆張粉陣吹
鸞笙遺民拜路傍號哭皆失聲吳山何青青吳水
何泠泠山水豈有極天地終無情回首叫重華蒼
梧雲正橫

宋宮人分嫁北匠

皎皎千嬋娟盈盈翠紅圍輦來路迢遞梳鬟理征

衣復采鴛鴦花綴之連理枝憂愁忽已失歡樂當
自茲君王不重色安肯留金闈再令出宮掖相看
淚交垂分配老斲輪強顏相追隨舊恩棄如土新
寵豈所宜誰謂事當爾苦樂心自知含情理金徽
繁聲亂朱絲一彈丹鳳離再彈黃鵠飛已恨聽者
少更傷知音稀吞聲不忍哭寄曲宣餘悲可憐薄
命身萬里榮華衰江南天一涯流落將安歸向來
承恩地月落夜烏啼

劉壘

前左丞相江文忠公

萬里弟萬頃

匡廬雲錦屏鴻儒產其下風神儼如龍夭矯莫可
駕卷懷經濟具婆娑洛中社怪事玉牀搖清晝天
忽夜突騎從何來陰風飄屋瓦大臣義有死欲避
吾不暇庭前環止水萬事付一捨從容友靈均朝
野動悲吒愍章極哀榮汗簡誰記者倘有南董書
季方足堪亞

梁棟

有感

少年不學稼老大生理拙入山採黃精窮冬一尺
雪虎狼正縱橫原野有白骨傷心重傷心吾饑何
足恤

林景熙

故衣

篋中出故衣絡緯聲四壁昔年慈母線一
手所歷眷眷遊子心惻惻虛堂夕逝水不返流孤雲杳
無迹空令攬衣人一線淚一滴衣敝耐有時母恩
無窮期終憐寸草心何以報春暉朝寒縱砭骨念
此不忍披且復返所藏永寄霜露思

九日會連雲樓分得落字

冉冉海霧深荒荒山日薄登高集華裾縱目天宇
廓落葉悲徂年寒英照深酌心醉乃文字意行非
澗壑緬懷斜川遊此道久寂寞胡爲吹帽人白首
戀賓幕窮途謬行藏異代縣美惡我愛漉酒巾西
風不能落

雜詠酬汪鎮卿

名鼎號桐陽平陽人

百感湊孤夜江樓起呼月秋蟲聲轉悲念此衆芳

歇人生非金石青鬢忽已雪踰淮橘心移出山泉
性汨猗蘭抱孤芳不受宿莽沒
垂垂大厦顛一木支無力精衛悲滄溟銅駝化荆
棘英風傲几礎濱死猶鐵脊血染沙場秋寒日亦
爲碧惟留吟嘯編千載光奕奕
權臣坐偃月棄官如飄蓬及茲顛沛秋翻然挺孤
忠一死未得所網羅挂秋鴻渡淮已不食蛻稿夷
齊風何人續遷史表爲節義雄

新豐道中

長飈卷炎埃澄空出秋素迢迢鐵甕城回首隔蒼
霧酒帘颺荒市笳鼓發深戍倚篷問舟人云是新
豐路籬落雞欲棲野水牛半渡不見抱琴者斜陽
在高樹

洞霄宮

洞天有別雲福地無凡土嘉名此兼擅靈氣適專
聚峰巒互重掩雲霧自吞吐飄然乘冷風一瓣謁
瓊宇住山老黃冠迎客琪樹午魚魚美少年華裾
集齋鼓往者修煉人飛舁接高武爾來何寂寥山

川亦今古甲第疑王侯億萬富倉廩所以氣體移
學道不精苦吾聞郭許儔卓菴老林莽終日對白
雲餐松飲石乳

寄四明陳楙陽

高人謝世紛誅茅在絕壁十年不下山舊路掩深
棘出門復踟躕觸步有崩石下臨千仞淵毒鱗正
紛籍腥風鼓洪濤石齒鳴咋咋失勢倘一落萬縷
那可及不如息我軀猿鶴與朝夕

寄周計院

延瑞安人

海桑變紛紛秀色見孤嶼山林華髮尊黨遂深衣
古獨餘釣天夢翛然在巖戶翳翳桂魄灰沉沉槐
夢雨江濤豈不深修鱗挂網罟不知義井船秋風
繫何許

程自修

獨坐

終南在吾目秋色遠接應誰招天外翠來作窗中
靚娟娟初画眉盈盈獨臨鏡雲去物象空月出心
源瑩我欲往從之有客誇捷徑洗耳復洗耳松風

入清聽
光風蕩繁囿丹綠綴柔柯遊子去萬里空閨歛翠
蛾行雲落江水酒盡不成歌雞飛與狗走妾命獨
奈何

皇甫明子

海口

窮島迷孤青颺風盪頑寒不知是海口萬里空波

瀾蛟龍恃幽沈怒氣雄屈蟠崢嶸挾秋陰挂席潮
如山熒惑表南紀天去何時還雲旗方慘澹腰下
青琅玕誰能居甬東一死諒非難嗚呼朝宗意會
見桑土乾

鮑 輓

天馬

天馬抱奇相繫骨瞳方明出入百萬中有如一鳥
輕宇宙莽超踏風雲慘經營獨倚雄傑態蕭蕭隨
北征朝飲南海頭夕秣乃幽并失主坐黯淡別羣

奮長鳴豈無輕俠兒金羈縣朱纓但感束帛義不
忍負死生低頭爲君老悋悋萬里情

孫璉

述懷

少也不諧俗老去益美閒百草生已綠春雨滿南
山朝朝荷鋤去旣夕驅牛還生長茆簷下貧賤良
獨安但願桑麻長優游足歲年

坐倦秋樹根攝衣步前丘橫河澹如練破月西南
流獨持一尊酒悠然發清謳俯仰無不足吾生焉

所求

楊雯

迢迢空同山

迢迢空同山乃在西極顛玉泉蔭靈芝上有千歲
仙安得凌風翼相從白雲間神仙本冥漠天運仍
推遷不如酌我酒或得成自然田父要我語飲者
亦非賢願君長獨醒加餐足高年

宋武帝廟

溪聲答松風巨石出老拳古樹不知名岌岌蛟龍

纏夕陰互出沒秋華帶芳鮮蔥蔥帝王氣基宇垂
千年虎賁乘霜戟慘澹生雲烟宮人翠龍駕手持
玉連蜷昌明坐恍惚精神雷在天大呼司雍間旬
月無秦燕昔爲萬夫特今受衆目憐石馬亦埋沒
歲時草芊芊小臣異代士見之淚迸泉齊人思爽
鳩蜀人哀杜鵑江東舊正朔禮奉敢不虔但願君
王心不忘載荻船下山又再拜白日當空縣

黃文雷

晚立

獨遊得荒谿晚意與心會水聲遠終聞山色靜可
對人語林塘邊犬吠籬落外柴門未須關月在東
峰背

道潛

廬山雜興

衆峰勢連環萬疊不可窮香爐獨秀拔佳氣常蔥
蔥長風卷游霧曉壁開瞳矐招提出其下樓觀排
青紅回眸盼五老刻削金芙蓉宜哉謫仙子愛此
集雲松

白鶴峰後原逶迤曠平陸道周問樵子古實青牛
谷披榛得徑路曳杖驚麋鹿鮑生古騷人曾過鍊
師宿明月古壇邊題詩記修竹茲焉廢耕隴歲晏
空菽粟薄日靜銜山驚湍瀉哀玉回首睇吾廬風
幡隔林麓

山深雲物清挹玩洗浮慮昨日行澗南飄然卽芒
屨風潭耿危杓晚與樵爭度隔水認梅花方驚歲
華暮幽人渺江海樂事期誰預山月獨多情娟娟
遲歸路

通玄接香谷夾道青松直高秋得微雨秀色寒更
碧林梢挂紅子照眼明的的散策從所歡悠悠事
遐歷僧房媚烟篆笑語戀几席陶謝安在哉空山
獨行迹

秋日西園

日月更代顯光華難並留昔人尚行樂俯仰無暫
休平居得君子出處常相求良辰援余臂共作西
園游極目瞰平野緬然見滄洲千林澹霽色萬韻
生涼秋露華溥菊英藹藹香可採參差間畦壠芋

栗森相儔綠蔓無芳姿碧花茂牽牛低回矚籬落
樹影環清流賞物志已諧何用登蓬丘

山家無外營超然閉幽室蒲團北窓下默坐終永
日炎景忽差池涼飈動蕭瑟中林多橘柚粲粲垂
華實凭高試裴回幽興遽超逸雲霞散平岡太白
空際出禽歸杳莫辨積翠鎖深蔚吁哉宇宙間濩
落竟何物胡爲市朝客終歲浪汨沒繫吾樂餘生
勝事良可詰放懷在冥冥身世兩俱失

嘗聞晉支遁矯志歸沃洲千載激清風邈哉誰與
儔余今雖不敏萬事非身謀竭來臥窮谷未覺慙
先修一法尚無遣何勞問三休卷舒有至理賞詠
歸優游採薇陟曾阿濯足依澗流但驚桂花折詎
識江漢秋滄溟空汗漫無意狎羣鷗

憶昔少壯時意氣摩雲霓游心黃卷間豈顧白日
西由來昧根本旦旦從所迷邇獨悟無爲文字如
委泥物生豈高下至道良自齊青山山遶吾廬開戶
衆鳥啼曉日上喬木秋光媚回溪畸人長往來絕
壁同攀躋遐天淨若掃曠目無端倪楚客一何苦

登臨獨悽悽

秋山夜來雨雲氣朝尚昏禪庭無來轍但見落葉
繁石室暗燈火天容開霽痕耳目思遠適曠然啓
曾軒長謠緩輕策去去窮深源方塘灑清流鳧鴈
靜不誼時遭羲皇翁容與諧笑言邈然採真賞歲
宴誰與論

子瞻赴守湖州少游與余同載因游惠山
覽唐處士王武陵竇羣朱宿詩追用其
韻各賦三首

山烟弄滅沒山木含葱蒼刺舟傍遙岸理策升虛
堂周遭矚曾巘矯矯如翱翔下瞰平田流澹然浮
日光青筍解初籜洗雨聞清香雖云迫前塗真賞
豈易忘

松門暗朝雨寂歷無行人隆曦忽穿漏卉木蔚以
新堦泉漱石齒照眼光磷磷史君美無度卓犖遺
囂塵風標傲竹栢談笑凌穹旻何愧沈冥子臥霞
貪結鄰

揚帆渡江來洗眼驚翠樾雲姿旣容裔鳥哢更清

絕凌梯訪前蹤
琬琰亦未滅
嗟我魚目光
疇能綴
明月狂墨掃
琅玕風烟坐
中發殊勝區
中人茫茫
走飛轍

志 詮

梵天寺

落日寒蟬鳴
獨歸林下路
柴扉夜不掩
片月隨行
屨惟聞犬吠
聲又入青蘿去

惠 洪

謁狄梁公廟

九江浪粘天氣
勢必東下萬山
勒回之到此竟
傾瀉如公廷諍
時一快那顧藉
君看洗日光正
色甚閒暇使唐
不敢周誰復如
公者古祠蒼烟
根碧草上屋瓦
我來春雨餘瞻
歎香火罷空讀
范公碑煩塵看
奔馬斯文如貫
珠字字光照夜
整帆更遲留風
正不忍挂

秀江逢石門
徽上人將北行
乞食而予方
南遊衡嶽作
此送之
筠袁脣齒
邦一水連清
碧朝行筠溪
邊暮見秀江

色忽聞兒童音乃知身是客獨歸江上寺杖笠倚
空壁犀顱會四海香火自朝夕相逢作熟視面數
心莫識但記石門時笑頰清光溢驚定喜失聲卒
語成小立是時夜氣清隙月金蛇擲念君當北行
鉢飯從誰乞我雖能少留秋燕社已逼一懽偶然
耳分首成陳迹他年何處逢話此空歎息

石霜見東吳誠上人

我尋流水行忽入霜華谷山陰見幽人目帶湖山
綠語溫如春風韻秀自拔俗暗驚枯木堂棲此一

枝玉遙知夜窓深雪響亂修竹寶書掩殘釭佳眠
正清熟逸想在西興清夢不容逐覺來念行處小
詩欲收錄詩成寫烏絲銀鈎奪人目棐几著牙籤
興來還自讀

珪粹中與超然遊舊超然數言其俊雅除
夕見於西興喜而贈之

蜀客快劇談風味出譏誚衆中聞巴音必往就一
笑道人西州來風度又高妙吾家長頭郎高蹈萬
物表平生少推可說子不知了吾初意魁梧一見

殊短小篝燈欵夜語每每犯吾料貌和華林風氣
爽霜天曉坐令岑寂中絕塵追騷曩君看顯與訥
出蜀亦同調竟如衆星月聲光潑雲嶠子亦當加
鞭歲月一過鳥

食菜羹示何道士

窮冬海道絕瘴雨晴虛里何以知歲豐未卯炊烟
起先生清夢回科髻方隱几獠奴拾墮薪發爨羹
藷米飽霜澗葉菘近水繁花薺都盧深注湯米爛
菜自美椎門醉道士一笑欲染指誠勿加酸鹹云

恐壤至味分嘗果超絕玉糝那可比鮮肥增惡欲
腥臄耗道氣畢生啜此羹自可老儂耳錄以寄徐
聞阿同應笑喜

寄彭景醇奉議

我菴湘山麓君家湘江尾共看湘山雲同飲湘江
水君有負郭田飽食驕穉世小兒操井臼大兒了
租稅我獨生事拙饘粥每不繼君如李大夫時時
容乞米永懷湖山堂風物自閒美楞嚴初讀罷篆
冷空窓几微風拾殘紅幽鳥妨春睡蒼苔滿門巷

榆柳陰覆砌杖策亦窺園悠然望屨翠歲時無營
爲祭奠修家禮自覺去幼安正復不遠耳遙知讀
此詩忻然開笑齒

會福嚴慈覺大師

慈覺初見我背呼仰而應遂同宿湘上夜語如建
瓴犀顛氣不讐虎領目有稜精彩類澄觀突兀掩
萬僧喬嶽占南極寒翠知幾層此老家此山親分
漳水燈寶坊天雨華午梵盤青冥欲知法席盛但
看道價增破夏出山來乃爾忘規繩蓋皮爲之災

公卿慕聲稱我幸無子累癡鈍人所憎平生寢飯
外摩挲一枝藤少年入三吳題詩徧西興歸舟來
彭蠡浪山雪崩騰匡廬落笑中萬疊橫空青又嘗
游并汾趺足渡河水衝虎上太行鷄鳴見日昇此
樂墮渺莽坐睡頭鬢髻榻來湘西塢倦鶴整羽翎
只待秋風健祝融期再登

契嵩

懷越中兼示山陰諸明士

厭見人境喧清遊憶靈越東南千萬山浮青滿寥

沈從來鑑中景形勝人間絕月湛換鵝溪雲起藏
書穴客子若飄蓬俄與故人別尺素未及通芳草
已云歇所悲行路難俛仰隕名節鳴雁欲東飛寄
語謝明月

韓希孟

練裙帶中詩

我質本瑚璉宗廟供蘋蘩一朝嬰禍難失身戎馬
間寧當鋒刃死不作衽席完漢上有王猛江南無
謝安長號赴洪流激烈摧心肝

